


SALOMON

Siue

PRO RELIGIONE CATHOLICA
& dignitate sacerdotali.

AD SERENISS: SIGISMVNDVM
TERTIVM, POLONIAE REGEM,

Petri Liliæ, Sacræ Theologiæ
Doctoris.



Bibl. Sec.

Coll. Rom. Soc. Scy

CRACOVIAE,
Ex Officina Lazari, Anno Domini,
M. D. Lxxxviii.

Cant. III.

EGREDIMINI ET VIDETE FILIÆ SION
REGEM SALOMONEM, IN DIADEMA-
TE, QVO CORONAVIT ILLVM MATER
SVA, IN DIE DESPONSATIONIS ILLI-
VS, ET IN DIE LETITIÆ CORDIS EIVS.

SALOMON,

Siue

PRO RELIGIONE CATHOLICA,
& dignitate sacerdotali.

*Ad sereniss. Sigismundum Tertium
Poloniæ Regem.*

PETRI LILIAE, S. T. DOCT.



Vm Regum sapientia & pietas totius Reipub. sit firmamentum, SIGISMUNDI REX SERENISSIME; profectò, in hoc tuo in regnum Poloniæ primo & optatissimo ingressu, illorum gratulatio meritò principem locum obtinuit, aliaque omnia benevolentiae pignora, longè multumque superavit: qui recta suadendo ad felicem huius regni gubernationem, totique Christianæ Reipub. salutarem viam tibi munierunt. Ut enim ex corde & cerebro vita, omneque robur in reliqua corporis membra deriuatur; ita in totam Rempub. salus dignitas & ornamentum ex Regis sapientia, veluti ex vberissimo quodam fonte, emanat. Itaque Salomon Rex omnium mortalium sapi-

entissimus, diuinis oraculis plurimum commen-
datur: quòd in regem Israël electus, omne boni
principis decus & felicitatem in vna sapientia sitam
esse iudicauerit, vnamq; ad rectè gubernandum re-
gnum, ardentissimis votis à præpotenti Deo expe-
tuerit sapientiam. Contrà verò vituperatur Robo-
am, filius tam sapientis patris insipientissimus, qui
prudentium virorum consilio repudiato, regnum
illud sapientia Salomonis in altissimo dignitatis &
felicitatis gradu collocatum, scidit atque turbauit.
Ego verò, SIGISMUNDE REX SERENISSIME,
cùm me in tuam sapientiam & pietatem mente &
cogitatione conuerto, facilè apud me statuo, hanc
meam orationem, qua consilium quoddam, ex inti-
mis religionis Christianæ arcanis depromptum, tibi
optimo principi, totiçue Poloniæ regno non vtile
solum, sed & necessarium explicandum proposui,
non ingratham futuram: nimirum ea ratione, & tu
me benignè attentèque audiendo, principis sapi-
entis, & ego clarè perspicuèque dicendo, viri bo-
ni & sacerdotis officium, persoluam. Quamvis
autem meæ tenuitatis sim mihi bene conscius, pro-
béque norim, quàm sit mihi curta supellex: si tamen
sanctissimus ille Dei spiritus, qui cum patre & filio
omnia regit & moderatur, numine cælesti mentem
meam afflaret, tantumque mihi in dicendo tribue-

ret facultatis, quantum res ea, quam nunc explicandam suscepi, dignitatis habet; nã ego cum gratissimo animo, non aquam, quemadmodum rusticus quidam Artaxerxi Persarum Regi, sed magnã præstantissimi auri partem, ex quo illius admirandę statuę Danieli prophetę diuinitus ostensę caput conflatum erat, quodque aureum seculum & florentissimum Reipub. statum designabat, tibi nouo & optimo Regi offerrem. Atq; hæc quidem cùm dico, nolim existimes, R E X Serenissime, me tibi aliquam doctrinam nouam, inauditam, & nuper exortam demonstraturum; Non enim ego in his nomen profiteor meum, qui pellibus ouinis cooperti, nouis subinde excogitatis dogmatibus cælum cum terra miscent, omniaque diuina & humana peruertunt iura. in doctrina antiqua & peruetusta, pro qua vitam sanguinemque meum immortalī Deo deuoui, mihi permanendum esse duco: quam Patriarchę & Prophetę, ac ipsemet filius Dei I E S V S CHRISTVS, & Apostoli tradiderunt: & admirandis editis prodigiis & miraculis confirmârunt: sanctissimi & doctissimi patres literarum monumentis illustrârunt: innumeri martyres Dei forriter effuso sanguine obfignârunt: concilia œcumenica explicârunt: quam denique vniuersa Christi Ecclesia, quę attestante D. Paulo columna & firmamentum est veritatis, recepit

cepit & celebrauit, eamque non ab humano ingenio, sed ab ipsa Dei altissimi sapientia, primum per ora Patriarcharum & Prophetarum, deinde per ipsius Iesu Christi os, & Apostolorum prodiisse nobis demonstrauit. Hac ego diuina & admiranda doctrina fretus, nunc breuiter ostendā in ardenti Iesu Christi religionis cultu, eiusque sacerdotali dignitate tuenda, omnem regni administrandi felicitatem, illiusque splendorem, & opes constitutas esse: hocque iter esse tritum & expeditum tibi, SERENISSIME REX, demonstrabo: & ad Dei gratiam, qua Christianis omnibus nihil maius, & antiquius esse debet, & ad eam gloriam, quam laudatissimis illis & potentissimis Imperatoribus & Regibus, victoriae & triumpho celeberrimi, ac tot tantaeque res fortiter & praeclare gestae pepererunt. Et quoniam omne datum optimum, & omne donum perfectum, descendit à patre luminum, eundem patrem clementissimum, per Iesum Christum eius filium vnigenitum, dominum & redemptorem nostrum humillimè precor; vt & mihi dicendi copiam, resque multis obscuras explicandi industriam, & tibi SERENISSIME REX, rem tantam tamque salutarem audiendi, probeque intelligendi, gratiam largiatur.

Salomon rex sapientissimus, vt primum ad regni Israëlitici gubernacula consedit, nihil habuit antiqui-

tiq̃uùs, quàm vt templo Dei magnificentissimè extructo, ac ingenti auri argentiq̃; copia locupletato, in animo populi Israëlitici ardens diuinæ laudis studiũ excitaret: quod non à patre tantũ Dauide Rege clarissimo, & Prophetarum principe, sed etiã ab ipso præpotenti Deo cælesti & admirabili sapientia collustratus didicisset: Omnium magnarum rerum principia à Deo immortali duci oportere. Magnum est hoc profectò, ad principes Christianos singulari pietatis & religionis studio inflammandos: Salomonem regem præstantissimum, talibus initiis, tam florens, tam splendidum, tamq̃; admirabile regnum Israëliticum constituisse. Prudentis enim & optimi principis munus est proprium, in rebus arduis de sapientissimorum hominum sententia, consilium cāpere. Sed illud multò maius est, totum illum diuinum & admirabilem regni Salomonis splendorem, ipsius Dei Opt. Max: ope & auxilio factum fuisse. Ex quo efficitur, Salomonis regni amplificandi & illustrandi, consilium non humanum, sed diuinum esse: nec ab illius ingenio, sed ab ipsa immensa infinitaque Dei sapientia, qua vniuersa mundi fabrica constituta est, profluxisse. Verũ regni Salomonis magnificentiam, REX SERENISSIME, parumper considera, vt inde clariùs perspicias, nullam industriam & ingenium, nullam artem & prudentiam, nullam

nullam scientiam & sapientiam humanam, diuini consilij præstantiam, excellentiamq; attingere posse. Quæ, cùm ex contentione soleant esse clariora, pone tibi ante oculos, magnum illum Alexandrum Græcorum regem; non tantùm historicorû & poëtarum laudibus illustrem; sed etiam ipsius Danielis prophetæ oraculo celeberrimum. In hoc enim vno ornando illustrandoque rege (vulgi opinione) natura omnes suas vires consumpsisse videtur. Intue-
 re igitur, *R* *E* *X* serenissime, magni Alexandri imperij amplitudinem: prouinciarum & regnorum multitudinem: vrbiũ splendorem: palatiorum magnificentiam: ciuium elegantiam: militum fortitudinẽ: senatus sapientiam: exercitum plurimum, & robustissimũ: ipsius regis in bellis gerendis dexteritatem: in domandis hostibus felicitatem: authoritatem apud suos; terrorem apud inimicos; immensam auri copiam: thesauros infinitos: nominis celebritatem: tot & tantas victorias & triumphos. Quid igitur hoc rege magnificentius? Paret huic Persa, vincitur Medus, Ægyptus seruit, Syrus subiicitur, barbarus Scythia domatur, totus denique terrarum orbis vni Alexandro cedit. At vni Salomoni tantus Alexander cedat necesse est, & sapientissimo & diuino Regi, concedat laurea regni. Quod ita se habere, si diligentius libros Regum, & Paralipomenon
 euolue-

euoluerimus, clarissimè perspiciemus. Est Salomoni sapientissimo regi immensa auri argentiq̃ue copia : miro artificio fabrefacta palatia : imperij amplitudo : robustissimus exercitus : sapientum hominum multitudo : sacerdotum dignitas : prophetarum præstantia : totius aulæ splendor : ordo , pulcherrima virtus, in omnibus admirabilis : tot tantarumq̃ nationum subiectio : hostes nulli , amici omnes : sine sanguine triumphus : summa pax, optata libertas : tribunal æquissimum : iudex sapientissimus. quæ omnia, cùm diuina illa sapientia, quæ attingit à fine vsq̃; ad finem fortiter, effecerit ; quis dubitare poterit maiestatem regni Salomonis, magni Alexandri gloriæ obscuritatem attulisse ? Mihi verò vna Regina Saba , suo è longinquis regionibus ad Salomonem aduentu, illaq̃ue insolita sapientiæ & maiestatis illius admiratione , satis eam rem comprobâsse videtur. Plurimi enim regnante Alexandro in Græcia floruerunt sapientia & doctrina excellentes viri, Speusippus Athenis, Calanus in India , multiq̃; philosophi Pythagorici in magna Græcia ; nullum tamen legimus videndi istius regis gratia longinquas regiones peragrâsse, ac illius magnificentia & splendore ad inusitatam admirationem raptum fuisse. Imò verò de Diogene philosopho sapientes viri memoriæ prodiderunt : illum ita longè ab admiratio-

ne magni Alexandri fuisse; vt cùm tantus Rex videnti eius desiderio ad eum accessisset, egregiæ voluntatis ostendens signa, ne ad punctum quidem temporis, ipsius regia maiestate, solis splendorem obtinuerit passus. At verò reginam Sabam, admirabili fama Salomonis sapientiæ, & regiæ dignitatis cōmotam, è longinquis regionibus ad eum venisse, ex sacris literis didicimus, cuius oculis tanta lux illius sapientiæ & magnificentiæ oborta est; vt maximæ admirationis modum prætergressa, non Salomonem tantum, tam admirabili sapientia & dignitate illustrem; sed etiam eos, qui tanti regis iussa capefferent, felices & beatos esse prædicârit. Quàm dissimilis, non in dissimili externo apparatu, regiæ dignitatis amplitudo! Illum Diogenes Philosophus contemnit, illiusq; magnificentiam & opes suo dolio inferiores ducit; hunc vero regina Saba suspicit & admiratur. at, quæ regina? ea, quæ non philosophorum sententia, non Delphico oraculo, sed ipsius Iesu Christi testimonio, non tantum Iudæorum scribas, sed etiam plurimos Christianos sapientia superauit: ac in illo extremo tremendoq; iudicio, in quo in fastum, superbiam, & inanes pompas maxima decernentur supplicia, suo studio multorum Christianorum, condemnabit ignauiam. Itaque Alexandri magnificentia inanis, vtpotè inflata,
super-

superba, ambitiosa, crudelis, Salomonis salutaris; quippè quæ de thesauris cælestibus dorsata, maximis virtutibus aucta & corroborata fuit. O admirandam Salomonis sapientiã, quæ cum tanta gloria & splendore, Dei gratiæ acquirendæ artes mirabiliter coniunxit, & vnde alij virtutis naufragium faciunt; inde ille ad ipsius virtutis & pietatis arcem peruenit. Manifestè igitur nobis regina Saba ostendit Salomonem magni Alexandri regium apparatus, longo interuallo post se reliquisse. Verùm enim uerò hæc tam singularis Salomonis magnificentia, Magni Alexandri gloriam, vulgi opinione maximam, longissimè antecedens, facillè cuius apparebit, qui modò accrem animum in vtriusq; imperium intenderit. Immensam auri copiã habuit Alexander; habuit & Salomon: longè suum regnũ extenderat Alexander; extendit & Salomon: vrbes plurimas, magnifica palatia, ciuium splendorem, insignium virorum copiã habuit Alexander; habuit & Salomon: ferocissimos quosq; hostes domuit Alexander; domuit & Salomon: fortissimum habuit exercitum Alexander; fortio-rem habuit Salomon. Ac ne quis hæc verbis à me ampla fieri existimet, libri Regum & Paralipomenonem ita se habere, satis apertè docebūt. In quo enim Magni Alexandri militũ aut Græcorum tantum robur & animi magnitudo enituit; quantã in Isrælito

illo exercitu, qui mortuo Dauide in potestatem Salomonis venit, cernere licet? Laudantur Epaminondas, & Pelopidas Thebani: celebrantur Chabrias & Iphicrates Athenienses. Hephestionis, Clitonis, Achilæ, Eumenis, Phylotæ, multorumque aliorum, qui castra Magni Alexandri sequuti sunt, rei militaris gloria ora hominum peruagatur: si tamē vera est de Herculis fortitudine antiquitatis sententia; nullus Græcorum Herculem, robore corporis & animi magnitudine adæquauit, de quo illud in prouerbiū abiit: Ne Hercules contra duos. Atqui Banaïas filius Ioiade Iudæus, duos fortissimos viros Ariel & Moab trucidauit: leonem, veluti alter Samson, in media cisterna interemit, & Ægyptium virum fortissimum, altitudine quinque cubitorum, & lanceam ut licitatoriū textentium gestantem, prostrauit. at, qua fortitudine? non ex insidiis, ut Græci plerunque solebant; sed aperto Marte contra eum progressus, hastam ex manibus illi eripuit, eademque tam vastum Gigantem confixit. Sed quid ego in Banaia viro fortissimo immoror? Iesboam filius Hachmoni, non cum duobus, non cum tribus, non cum triginta, non quinquaginta fortissimis viris, non denique cum centum; sed quod incredibile videtur, verissimum tamen est, vnus cum trecentis congressus est, ac eosdem omnes vulneribus affectos profligauit. Eadem

dem animi magnitudo & robur, Abisai fratri Ioab tribuitur, qui eadem ratione vnus trecentos superauit. Quem igitur, aut vnus Alexander Macedo, aut omnes, vnà cum Alexandro, tam Græci, quàm Latini Imperatores Hectorem, quem Achillem, quem Vlysses, quem Herculem, tantæ Hebræorum fortitudini opponere poterunt? Sed illud factum admirabile, trium fortissimorum militum, hoc loco præterire non possum. Daud Rex Salomonis pater, post celeberrimam illam victoriam, qua paucissimis stipatus militibus, maximum Philistinorum exercitum fudit, ardentissimam sitim aquæ portione ex cisterna Bethlehem pellere desiderat. en igitur tres robustissimi milites in maximum Philistinorum exercitum irruunt, mediam aciem hostium per-rumpunt, & aquam haustam ex cisterna Bethlehem Dauidi afferunt. O fortitudinem admirabilem, ô inauditam animi magnitudinem! Vt potu aquæ Ducem suum recrearent, in confertum hostium agmen ruunt: quod facinus pro vita illius animo non designarent? quæ pericula pro salute patriæ non adirent? in quod discrimen, pro gloria dei vitam suam non conijcerent? Nunc igitur Homerus Poëtarum princeps, omnem vim ingenij sui exerat: Virgilius Maro, Heliconis fontes adeat, omnia pigmenta orationis conquirant: ornet ille su-

um Vlyſſem; hic Æneam: vterq; acies illorum maxima virtute armet: efferat in cælum inuictos animos: robur corporis amplificet: ornatissimis verbis illorum res præclare gestas, centum partibus maiores efficiat; nunquam tamen nec Græcorum, nec Latinorum viri fortissimi, tantum & tam eximium Hebræorum robur, virtutem, & excelsi animi magnitudinem consequentur. Sed neque illa in regno Salomonis sunt minora, quibus aliquis de media plebe Salomonem ab Alexandro superatum esse existimare posset. Totum enim terrarum orbem suo imperio subiecisse Alexander memoratur: indeque illi immensæ opes infinitiq; thesauri. Constat autem Salomonem, nec Scythis, nec Afris, nec aliis multis nationibus, quas Alexander armis oppresserat, bellum intulisse. Facile hæc vir sapiens, & multò magis Christianus Philosophus reiiceret à magnificentia & felicitate regię dignitatis: & tametsi Salomonis regnum angustioribus terminis contineretur; illud tamen ob cæteras sapientissimi Regis virtutes, in quibus maximus regię maiestatis splendor elucet, latissimo Alexandri imperio anteponeret. Cum enim opes & regnorum possessio regię virtutis sint instrumenta; non spatium terrarum, sed virtutis præstantia regiam dignitatem metiretur. Opes autem, & multitudinem prouinciarum bello
iniu-

iniusto partas iudicaret esse non incrementum regniæ dignitatis ; sed incitamentum immanis cupiditatis. Verumenimuerò clementissimus Deus tot Reges & Principes Salomoni subiecit , tot regnis & nationibus illum præposuit , illique tantas opes , tantamque auri & argenti copiam est largitus ; ut non modo sapientum sententia , sed etiam vulgi opinione Salomon Rex & ditissimus & potentissimus haberetur , & esset. Nihil ego hîc dicam : ea tantum quæ de Salomonis potentia & opibus , sacris literis sunt consignata , recensebo : tu ea suis momentis ponderabis. In libro Paralipomenon ita scriptum legimus : *Omnes Reges terrarum desiderabant videre faciem Salomonis , ut audirent sapientiam , quam dederat Deus in corde eius : & deferrebant ei munera , & vasa argentea , & aurea , & vestes , & arma ; & aromata , & equos , & mulos , per singulos annos.* en Salomonis dignitas. Vis videre ornatum Regium ? *Habuit quadraginta millia equorum in stabulis , & currum equitumque ; duodecim millia , constituitque eos in urbibus quadrigarum , ubi erat Rex in Ierusalem.* en apparatus Regius. Vis potestatem ? *Exercuit potestatem super cunctos Reges , à flumine Euphratæ usque ad terminum Philistinorum.* en potestas. Vis opes & immensam auri copiam ? *Erat autem pondus auri , quod offerebatur Salomoni per singulos annos , sexcenta sexaginta*

2. Par. 9.

ta sexaginta sex talenta auri: excepta ea summa, quam legati diuersarum gentium & negociatores afferre consueuerant, omnesq; Reges Ambie & Satrapæ terrarum, qui comportabant aurum & argentum Salomoni. Quis igitur dicet Salomonem ab Alexandro potentia & opibus superatum? Toti ferè terrarum orbi imperauit Alexander. Atqui & hic audimus omnes Reges terrarū, in singulos annos maximis muneribus datis Salomoni totius orbis principatum detulisse. Non igitur opibus, non imperij amplitudine, non regnorum multitudine Alexander superauit Salomonem; at Salomon Alexandrum superauit, multumq; illi, ad veræ & solidæ laudis gloriam antecessit. Alexander imperij amplitudinem & opes magnis sudoribus emit, innumerabiliumq; virorum vita & sanguine; at Salomon nullo funesto prælio, nullo damno militum, nulla exactione ciuium ad eas opes, & regni amplitudinem peruenit. Ille crudeli victoria & hostili terrore homines comprescit; hic virtutis & sapientiæ splendore, vniuerso terrarū orbi clementissimi Principis iugum imposuit: ille gloria inani inflatus, solaque regnandi libidine incitatus, omnium gentium seruitutem concupiuit; iste nulla ambitione lapsus, solam Dei spectans gloriam, omnium Regum animos sibi deuinxit: ille hostili furore & crudelibus armis, multas ciuitates vastauit,

stauit, spoliavit; hic benignitate & clementia, multas vrbes instaurauit, multas crexit, multas locupletauit: ille vt thesauros acquireret, sæpè iniusto bello, & rapinis, iustitiæ & æquitatis opes amisit; iste cum maximis opibus, iustitiæ & æquitatis iura retinuit: ille temeritate, & sine consilio multa gessit & turbauit; hic magno consilio & prudentia, omnia confecit & constituit: ille non exteris tantum gentibus, verum etiam non paucis ex domesticis iniunctus; hic & suis, & omnibus exteris nationibus gratissimus: ille fluxis & caducis rebus nimium deditus immortalibus bonis sese priuauit; hic in maxima rerum copia, in summa gloria, maximas diuinæ gratiæ opes sibi comparauit. Vicit igitur Salomon Rex, Alexandrum Macedonem, opibus: vicit robore & fortitudine militum: vicit celebritate nominis: vicit imperij amplitudine: vicit potentia: vicit regnandi felicitate. Verum non his tantum rebus Regni Salomonis præstantia excellentiaque terminatur. Ad hæc enim omnia, sapientiam diuinam, aut potius in vna diuina sapientia, qua nihil à Deo immortalis vberius, nihil præstantius hominum vitæ datum est, plurima & maxima felicitatis, & dignitatis bona adiunxit. dicam & maius aliquid & verius, in vna sapientia, non plurima, sed omnia Regno Israëlítico contulit Rex sapientissimus. Est enim

sapientia illud vultus Dei lumen : quo, vt testis est propheta Regius, eius maxima liberalitas & clementia humanas mentes signare, illisque veluti expressam quandam suæ naturæ imaginem imprimere solet. Quo fit, vt eum ex ipsius quasi diuinitatis stirpe generetur, quemadmodum diuina natura, omnes omnium rerum perfectiones modo admirabili in se comprehendit; sic rerum omnium præstantiam, suo ambitu complectatur atq; coërceat diuina sapientia. Hac vna, res minimæ in maximas excrescunt; sine hac, maximæ dilabuntur. hæc regna constituit: prouincias distinguit: vrbes munit: domos extruit: iudicia exercet: acies instruit: principes ornat: milites armat: ciues ditat: hostes domat: vicinos regnis sociat: & quod summum est, humanas mentes disiectis ignorantiae tenebris, cognitione Dei informat: diuino amore incendit: errores noxios extirpat: Christianam religionem instituit: ecclesias illustrat, auget, tuetur, & amplificat; & ita homines Deo simillimos reddit, vt vnus cum Deo spiritus efficiantur. O admirabilem diuinæ sapientiæ vim & præstantiam! Quid enim ea re maius & excellentius esse, aut fingi, cogitari ué potest: quæ homines ita Deo similes reddit, vt vnus spiritus cum eo efficiantur? Atq; hoc quidem incredibile alicui videri posset, nisi hoc ipsum spiritus Dei in diuinis literis,

ris, Ecclesiæ suæ disertis verbis tradidisset: *Erunt*, ^{1. Cor. 6.} *inquit, duo in carne vna. Qui autē adhæret Domino, vnus spiritus est.* Quid clariùs? quid ad homines cælestis sapientiæ studio inflammandos efficacius? Nichil igitur mirum, si sapientia res omnes fiant eximiæ, admirabiles, & diuinæ: contrà verò sapientiæ ope destitutæ, exiles, fluxæ, caducæ, inanes. Ac vt vno verbo sapientiæ vim exprimam: quod est oculus in capite, animus in corpore, Sol in hac rerum vniuersitate; hoc est, in humanis actionibus sapientia. Tolle hūc lucidissimum Solem, cuius lumine & motu, hæc omnia infrà Lunam posita consistunt; an aliquid præclarum in hoc terrarum orbe apparebit? Tolle è medio sapientiam; an non confestim splendor Reipub. Regis maiestas, Senatus authoritas, illaq; omnia in quibus Reip. salus & dignitas cōcluditur, eodem labefactata motu corruent? Rex Syriæ oppugnans populum Israël, cū Eliseum prophetam Regi Israël suā consilia prodere intellexisset, maximo exercitu misso, Dothain, vbi tum agebat Eliseus, noctu obsedit, quo cognito puer Elisei, magno timore perculsus, prophetæ nunciat. Ille verò facta oratione, puero ostendit, montem plenum equorū & curruum igneorum diuinitūs in auxilium sibi esse missum. quò cū conscendunt hostes Eliseum capturi, protinus excœcantur, & ab ipso propheta

in Samariam inducuntur. Vbi visus iterum restituitur hostibus Elisei; sed non sine magno metu. & dolore. Tunc enim luce palàm vident, se omnes ab vno inermi Eliseo captos & superatos esse. Scilicet, Deus clementissimus, hoc tam insigni spectaculo omnibus perspectum & exploratum esse voluit; quibus præsidis sanctos viros communiat, & quantū ad omnem impetum hostium propullandum in vna insit sapientia: quippè quòd illa vim admirabilem, & diuinā, innumeris equis & curribus igneis similimam, in se complectatur; atque ita sine auxilio humano, dignitatem suam tueri possit: auxilia verò humana, sine sapientia nequaquam: quemadmodū cæcus exercitus, qui amisso lumine, vires suas penitus enervauit. Quomodo enim exercitus orbatus lumine, hostem feriet: qui quo se verrat, & vbi pedem ponat, omninò ignorat? Porro, quod est lux ista, quam oculis cernimus corpori; hoc est, sapientia menti. Sapientiæ beneficio belli imperatores loca pugnae opportuna designant: tentoria figunt: acies instruunt: militem in hostem concitant: & denique & initium, & progressum, & exitum belli sapientiæ artibus freti conficiunt. Quòd si inter strepitum armorum tantum valet sapientia; quantum in pace, quantū in Senatu eam valere existimabimus? An ille, qui nescit, in quo æqui & iniqui ratio consistit,

stet, rectè iudicabit? vel ille, qui verè felicitatis fontes ignorat, de summa rerum per commodè concludet? Dissentanea hæc sunt, penitusq; contraria: ex æquitate iudicare, & quid sit, & in quo sit æquitas ignorare: à summo bono in ferenda sententia nō deflectere; & tamen nec summi boni rationē, nec viam, quæ ad illius possessionē ducat, animo comprehendere. Itaque qui insipientem, vel rectè iudicare, vel aliquid decernere fructuosè posse existimat; perinde est, ac si quis dicat sagittarium egregiè scopum attingisse, & tamen scopum ubi esset non vidisse. Rectè igitur diuinus Plato eas demùm Respub. felices esse iudicauit; quas aut philosophi regerent, aut quarum Reges philosopharentur. Verùm an non ipse Christus dominus, cuius sententiam in dubium vocare flagitium est æterno supplicio expiandum, omnem Ecclesiæ suæ, pro qua diræ mortis acerbissimos cruciatus perpeffus est, gubernationem, ita in sapientiam contulit; vt fatuos & insipientes Ecclesiæ præsides cœcis ducibus, quos imperitia, vnà cū iis, quibus se ductores præbent, in fossam mortis sempiternæ præcipitat, cōparauerit? contrā verò sapientem Ecclesiæ magistratum, lucernam ardentē, petram, fundamentum, sal terræ, lucem denique mundi appellauerit? quòd illius sapientia, id sit orbi Christiano, quod petra & fundamentum ædificio:

sal cibis condiendis, & sanandæ putredini: lux solis splendidissima toti vniuersitati. Neque verò, quòd hæc tanta sapientiæ vis sensu & oculis non cernatur, minor ideò existimanda est. Neque enim hominis animus oculis cernitur, nec virtus sensu percipitur, nec Solis operatio visu vsurpatur; & tamen & corporis vitam anima consistere, & virtutis officio felicitatem contineri, & Solem licet altissimè sit positus, non ea solùm quæ supra terram natura locauit, sed etiam illa, quæ vel in cauernis montium abdidit, vel in altissimo mari demersit, vel in visceribus terræ conclusit efficere omnes confitentur: nullusq; in eo visum, vbi ratio ipsa loquitur, iudicè adhibendum esse putat. Belluæ non homines censendi sunt, qui illud tantùm, quod sensu attingunt, in rerum natura cohærere existimant. Sed horum non Christianis tantùm, sed & philosophorum decretis, ex hominum coetu iampridem explosa est sententia. Quis autem vidit, aut videre potuit, cùm præpotens Deus hanc maximam & admirabilem totius vniuersitatis machinam ex nihilo produceret, ordineque admirabili illustratam, tot tantisque gloriæ suæ opibus ornaret? & tamen Salomon sapientiss. cuncta hæc diuina sapientia effecta esse asseuerat. Sapientia enim, attestante Salomone, vel potius ipso spiritu Dei teste, Excidit sibi columnas septem, illamque domum

domum, in qua ipse Deus cum illis beatis mentibus, ab omni concretionem materiæ liberis, æuo perfruitur sempiterno, exædificauit: sapientia, orbem cælestes, Luna, stellis, Sole, aliisque sideribus illustrauit: sapientia, totius vniuersitatis fundamenta iecit: sapientia, terram libratam ponderibus ab aquis diuisit, & vtraque in medio cæli mirabiliter appendit, cauernis maria sustentauit, sustentatque; vniuersa denique creauit, auxit, & illustrauit sapientia. Quid igitur Salomonis consilio melius? quid prudentius? quid salutaris? qui in regiam dignitatem euectus, ut munus hoc amplissimum & difficillimum rectè & laudabiliter obiret, videretque sine sapientia nihil præclarum effici posse, non aurum aut gemmas pretiosas, nec amplissima terræ & maris spatia; sed vnam sapientiam à præpotenti Deo maximis precibus expetiuit & obtinuit. Quo singulari Dei munere cumulatus, velut Sol altissimus suo lumine tenebras depellens, noxiisque humores exsiccans, vniuersam terram illustrat; & hac vna re vario & multiplici beneficio eam afficit: Nam hoc eodem suo lumine, plantis vitam, & animantibus sensum tribuit: gemmis splendorem donat, lapidibus virtutem largitur: herbas odore imbut: flores pulchritudine vestit: sylvas frondibus tegit: campos amœnitate ornat: agros fertilitate & vbertate ditat, &
nobi-

nobilitat ; sic Salomon Rex, è suo regali folio, ea omnia bona, à quibus Reip. salus & dignitas dependet, Israëlitico regno vna contulit sapientia. Quid enim Salomonis regnum primùm oppressis hostibus, & sceleratis ciuibus perpurgauit & communiuit, deinde imperium eius orbis terrarum terminis definiuit ? Sapientia. Quid fama & celebritate nominis, omnium gentium & populorum, Reges & Principes, in admirationem Salomonis conuertit, & Reginam Sabam, longinquas regiones peragrarè coëgit ? Sapientia. Quid Salomoni à totius orbis Regibus & Principibus, vectigalia conciliauit, tot prouincias Iudææ adiunxit, tot vrbes pulcherri-
mas extruxit, tribunalia admirandis iustitiæ & æquitatis laudibus exornauit ? Sapientia. Quid Salomonis imperium, inter omnia regna & imperia, quæ aliquando Sol aspexit, diuitiis, opibus, gloria, magnificentia tantum extulit ; quantum se efferre lenta solent inter viburna cupressi ? Sapientia. Quid Salomoni eam mentem iniecit ; vt suum imperium à diuinę legis ardenti studio, & à Dei gloria auspicaretur, & in eius amplificatione, regni Israëlitici summam felicitatem, omniaque bona statueret ? Sapientia. Quid illi cælestium rerum, & obscurissimarum tantam intelligentiam enodauit, illiusque animum à rebus fluxis & caducis abstractum, abruptum.

ptumque flammis diuini amoris adeò incendit, vt præter Deum illiusque sanctissimi nominis cultum & gloriam, omnia vanitatem vanitatum esse proclamarit? Sapiaentia. Quid illud templum Salomonis admirabile magnificentissimè extruxit, immensaq; auri & argenti copia ditauit? Sapiaentia. Quid Salomoni persuasit, vt immensis victimis altaria oneraret, & Dei laudem illiusque sanctissimum cultum, cum dignitate & emolumentis sacerdotum ita coniungeret; vt iis, quæ in sacerdotum vitam bene honesteque sustentandam cederent, Dei ipsius gloriã, & sanctissimũ illius cultum, contineri existimaret? Sapiaentia. Quid ad extremum, non aliter, atq; Elias propheta, ignem in altaria aquis perfusa, sic gratiam cælestem, præsidia firmissima, omnemque & diuinam & humana n felicitatem, in regnum Israëlis è cælo deuocauit? Sapiaentia. Quis Oceanus tot fulgentes gemmas, lapidesque pretiosos, suo profundissimo, longissimoque sinu complectitur; quot res tantæ & tam diuinæ cum maximo commodo & dignitate regni Israëlitici in vna Salomonis sapientia elucet? Sed vt aliquem finem, & modum diuinæ sapientiæ, quæ nullum finem modumque habere videtur, faciamus, concludam illud de Rege Salomone, illiusq; regno felicissimo: Deum Opt: Max: vt in sanctissimis illis Patriarchis, Abrahamo fidei,

Iſaäco obedientiæ, Iosepho castimoniæ, Moyſe charitatis, Iobo patientiæ, Tobia mansuetudinis, Daniele abſtinentiæ, Dauide pœnitentiæ, Samſone fortitudinis, Iofia pietatis, Elia vitæ auſteræ; ſic in Salomone Regis præſtantiffimi, perfectum abſolutumq; exemplar nobis exprimere voluiſſe. Et quem admodum idem clementiffimus Deus, Dauidi Regi templi à Salomone ædificandi effigiem oſtendit; ſic in regno Salomonis ideam abſolutiffimi perfectiffimique regni poſuit, & quibus principiis, tam diuinū & admirabile opus excitari, & quo pacto ad faſtigium perducī debeat, omnibus Regibus & Principibus, quibus cura conſtituendæ Reipub. incumbit, demonſtrauit. Quare euenit, vt ipſemet Dei ſpiritus æqualis Patri & Filio Deus, in libro quem Salomon inſcripſit, Cantica Canticorum, ex omnibus Regibus, qui aliquando regia dignitate excelluerunt, vnum Salomonem delegerit, ad quem in ſuo regali folio ſpectandum, cū alios omnes, tum præcipuè Reges & Principes Chriſtianos, his verbis inuitaret:

Can. 5.

EGREDIMINI ET VIDETE FILIÆ SION
REGEM SALOMONEM, IN DIADEMA
TE, QVO CORONAVIT ILLVM MATER
SVA, IN DIE DESPONSATIONIS ILLI-
VS, ET IN DIE LÆTITIÆ CORDIS EIVS.

Egre-

Egredere igitur & tu, SIGISMUNDE REX optime, & illis sanctiss. Regibus, Iosaphat, Ezechia, & Iosia, in quorum etiam sunt numero cum alij Christianissimi Imperatores, Constantinus Magnus, Heraclius, & Theodosius, tum vt nunc alios omitam, iste non ita pridem vita defunctus Stephanus Rex noster, immortalis gloria dignus te socium adiungens, vide Salomonem Regem in diademate, quod ex pretiosissimis Dei gratia gemmis margaritisque contextum, mater sua capiti illius imposuit: mater illa, inquam, sua, diuina sapientia, cum qua vna Salomoni omnia bona diuinitus sunt concessa: *Venerunt*, inquit, *mibi omnia bona pariter cum illa, & innumenabilis bonestas per manus illius..* Egredere igitur, egredere, Rex optime, vna cum illis optimis Regibus ad spectandum Salomonem. Egredere autem non mea, aut alicuius hominis, neque quod maius est angeli, sed ipsius Dei Opt. Max. cohortatione concitatus, & vide Regem Salomonem, tam præstanti diademate coronatum.

Sap 7.

Equidem, tametsi ea, quæ paulò antè ex libris Regum & Paralipomenon, de regni Salomonis præstantia, à me explicata sunt, intelligentiâ nostram fugerent; tamen ex eo, quod ad Salomonem spectandum mirandumque; ab ipso met Deo, filia Sion, hoc est, homines gratia Dei affluentes inuitentur, eximium quen-

Hom. ad
pop: An-
tioch.

dam splendorem & magnificentiam in regno Salomonis inesse existimare deberemus. Neq; enim Dei infinita sapientia, quæ totâ vim bene viuendi in omnium rerû humanarum contemptione & despicientia ponit, res viles & abiectas admiratione dignas duceret. Diuus Chrysostomus populo Antiocheno curæ & sollicitudinis humanæ vanitatem describens, illas beatas mentes omnesq; cæli ciues, qui Dei maiestatem contemplantes, felicissimo & sempiterno æuo perfruuntur, ita eorum hominû curas, qui parû cælestia spectantes, huius mundi rebus, eiusq; vanissimæ gloriæ immerfi, domibus exædificandis, bellis gerendis, opibus congerendis, aliisque id genus rebus, gloriam humanam captant, ventosque populares colligunt, æstimare & ridere asseuerat: quem admodum nos pueros in arena confidentes, domosque ex luto ædificantes, & destruentes, ridere solemus. Ergo solium Salomonis illiusque præstans diadema, quod Deus ipse Opt. Max. admiratione dignum iudicat, & ipse quasi admiratur, omni humana gloria & magnificentia tantum præstat; quantû cælestium rerû diuitiæ, quarum admiratione beatæ illæ mentes, quos angelos nominamus, capiuntur, his fluxis & caducis rebus, in quibus humana stultitia suæ felicitatis finem defixit, ad omnem dignitatem & præstantiam antecellunt. Neq; verò in sacris

libris

libris obscure significatur ista Salomonis regni præstantia & maiestas. Nam ab illa Dei immensa sapientia, non solum Salomon coronatus esse dicitur; sed etiã coronatus esse, *IN DIE DESPONSATIONIS ILLIVS, ET IN DIE LAETITIAE CORDIS EIVS.* Quibus verbis admirabilis, quidam splendor regni Salomonis ostenditur. In conuiuio enim & sponsalibus, Reges & Principes, maximas opes expromere, suosq; omnes suos thesauros excutere solent; vt illustribus & magnis viris, rerũ magnificentia & copia, suam præstantiam commendarent. Præclaram eius rei imaginẽ in Assuero Rege præstantissimo, nobis diuinæ literæ proposuerunt, qui in illo prægrandi splendidoq; conuiuio, quo totius orbis Principes exceperat, & Reginam Hester matrimonio sibi copulârat, suam sapientiam, opes, potentiam, splendorem, & maiestatem demonstrare est conatus. Maxima erat in illo conuiuio lætitia: summa rerum omnium copia: exquisiti & varij cibi: vina optima: concentus ibi suauissimi personabant: ludi varij exercebantur: vndique autem aurum, gemmæ, lapidesq; pretiosi, aulæa & stragula magnificis operibus picta: imagines eleganter fictæ, & simulachra affabrè, & antiquo artificio facta, in oculos admirantium incurrebant. Hæc tametsi sapientes, & qui cælestia spectant parum moueant, multò minus be-

atas illas mentes ; illis tamen veluti quibusdam vestigiis mortales , rerum caelestium notitiam consequuntur. Itaque diuina sapientia, ut se in tradenda doctrina hominum capacitati accommodaret, non in quavis die , sed in die desponsationis illius , & in die lætitiæ cordis eius, Salomonem coronatum esse voluit ; ut ex iis , quæ sub aspectum cadunt rebus coniecturam faceremus, quantis opibus æternæ felicitatis regnum Salomonis nobilitatum & illustratum, quantaque voluptate gratiæ Dei delinitum fuisset. Quod si in Assueri Regis conuiuio, splendor & maiestas hominibus admirationem commouit ; consequens profectò est ; illa quæ Deus præpotens Salomoni dedit sponsalia, ipsis beatis mentibus incredibilem quandam admirationem attulisse. An non singularis illa Dei clementia, quam Deus benignissimus, Iacobo Patriarchæ dormienti apparens, cum illoque innixus scalæ, quæ in cælum vsque protensa, Angelos descendentes & ascendentes ferebat, amantissimè alloquens, ostenderat, omnes cælestis regionis ciues, rem tam mirabilem & inusitatam spectantes, obstupescit ? Atqui & Salomoni , cum maximè incenderetur ad Dei gloriam, cumque innumeras illas hostias Deo litasset, bis Deus apparuit, primò in Gabaon, secundo Ierosolymæ ; cum templi ædificio magnificentissimè inchoato fastigium im-

um imposuisset. ac ne quid ad summam gratiam Salomoni deesset, non solum illi apparuit, sed etiam cum illo est colloquutus. at quàm familiariter? at quàm amanter? *Postula*, inquit, *quod vis, et dem tibi*. An non his paucis verbis, omnia illa auxilia & beneficia comprehendit: quibus vel Moysen in Ægypto, ab obstinato Pharaone; vel Eliam in monte à Regis Samariæ tribus quinquagenariis Principibus; vel Eliseum in Dothain, à Regis Syriæ maximo exercitu admirabiliter defenderat? Enimuerò hanc ipsam gratiam, paucis conclusam verbis, idem liberalissimus clementissimusq; Deus, signis & prodigiis explicauit. Primò enim, cum Salomon sacrificia sua, precesq; perfecisset, ignis delapsus è cælo, incendio & ardore absumpsit holocausta, & victimas. Deinde: *Maïestas Dni impleuit domum: nec poterunt sacerdotes ingredi templum Domini: cò quòd impleisset maïestas Domini templum Domini. Sed & omnes filij Israhel videbant descendentem ignem, & gloriam Domini super domum, & corruentes in terram pro ni, super pauimentum statum lapide, adonauerunt & laudauerunt Dominum; quoniam bonus, quoniam in seculum misericordia eius.* Ad extremum, his verbis, præpotens Deus, suum incredibilem amorem Salomoni, eisq; omnibus, qui in templo à Salomone exædificato, cum summè colerent, testatus est: *Apparuit*

2. Par. 7.

paruit autem ei Dominus noctu, & ait: Audiui orationem tuam, & elegi locum istum tibi in domum sacrificij. Si clausero cælum, & pluuia non fluxerit: & mandauero & præcepero locustæ, vt deuoret terram: & misero pestilentiam in populum meum; conuersus autem populus meus, super quos inuocatum est nomen meum, deprecatus me fuerit, & exquisierit faciem meam, & egerit pœnitentiam à viis suis pessimis: & ego exaudiam de cælo, & propitius ero peccatis eorum, & sanabo terram eorum. Magna hæc: Sed quæ sequuntur sunt maiora: Oculi quoque mei erunt aperti, & aures meæ erectæ ad orationem eius, qui in loco isto orauerit. Elegi enim & sanctificaui locum istum, vt sit nomen meum ibi in sempiternum: & permaneant oculi mei & cor meum ibi cunctis diebus. Magnam profectò hæc vim habent ad explicandam diuinæ clementiæ magnitudinem. Cùm enim Deus sit ubiq; & ita sit simplicissimus, vt quarumlibet partiũ, quæ compositionem efficiant, sit omninò expers; alioqui nec esset simplicissimus, nec primi principij nomen obtineret; cùm primi principij, non sit principium: Deus autem, si ex partibus, tanquam aliquod totum constaret, principium sui haberet, cùm partēs sint totius principia; profectò in Deo, hoc ipsum quod est cor, est & oculus, & pes, & manus, & si quid aliud est, quod ad exprimendam vim & maiestatem diui-

3. Reg. 6.

2. Par. 7.

diuinam, sancti prophetæ cælesti numine afflati, ex rebus sensibilibus & corporeis in Dei naturam transtulerunt. Secus est in homine & in animante, cuius diuersis operationibus, diuersas corporis partes natura destinauit, fecitque vnâ corporis partem alia præstantiorem. Cor enim & oculus, multò præstantiores operationes edunt, quàm reliquæ omnes corporis partes; quorum illud fontem vitæ continet, ille verò, vt Sol sidera, sic totum corpus lumine suo coillustrat. Et quoniam diuina illa essentia, licet sit vna & simplicissima, ita vt quemadmodum summi Theologi, doctissimè decreuerunt, non solum rei, sed nec formalem nec rationis compositionem admittat, diuersa tamen opera efficit, & alia aliis præstantiora: hinc factum est, vt sicut ipsa sine magna suæ præstantiæ & dignitatis iactura, in partes cuiuscunque generis distrahi non potest; ita diuersa illius & admiranda opera, diuersis corporis partibus, & præstantiora præstantioribus, & præstantissima præstantissimis, quales sunt cor & oculi in corpore humano, aptissimè designentur. Locus etiam cùm in toto vniuerso cælum sit nobilissimus, terra infimus, & operationibus dignitate & ordine supremis, locus nobilissimus; iis autem, quas infrâ omnes natura amandauit, locus infimus debeatur; hinc quoque fit, vt præpotens Deus, oculis & corde

in cælo habitare, terram autem suis pedibus, veluti quoddam scabellum subiecisse dicatur: *Hæc dicit Dominus*, apud Isaïam prophetam, *Cælum sedes mea, terni autem scabellum pedum meorum*. Quid? quòd & D. Iacobus Apostolus: Omne datum optimum, & omne donum perfectum, è sursum esse, à patreque; luminum descendere; & ipsemet Christus Dominus, Angelos, qui singulari Dei benignitate & clementia ad custodiã paruulorum in terra aduigilant; non in terra tamen, sed in cælo patris faciem, quæ sedes oculorum est, videre asseuerat? Cùm igitur clementissimus Deus, cor suum & oculos suos, in templo Salomonis constituat; an non eam admirabilem operationem, gratiæ suæ, qua angelos & sanctos lumine vultus sui de claritate in claritatem transformat, è cæli regionibus, in templum Salomonis transferre videtur? O admirandam Dei clementiam: ô terque quaterque beatam Salomonis felicitatem! qua non solum cum Salomone Deus in sublimi manens cælo, innixus scalæ, vt quondam cum Iacobo Patriarcha loquitur; verum ipsemet ad templum Salomonis descendere, & quasi è cælesti palatio commigrare videtur. Quomodo autem ea, quorum amplitudo verbis efferri non potest, clariùs exprimi potuerunt? Ignis consumens Deus in sacris libris appellatur. en igitur, vt omninò Deus de-

scen-

scendisse videatur, ignis è cælo videntibus omnibus in hostias Salomonis descendit. In nube Dominus habitare dicitur. sic enim docet sapientiss. Salomô : *Dominus dixit, ut habitaret in nebula.* & Iob : *Num^{3. Reg. 8} eleuabis in nebula vocem ? en igitur nebula impleuit domum Domini, & non poterant sacerdotes stare & ministrare propter nebulam.* Et ne de hac sua immensa clementia aliquem ambigendi locû relinqueret; quid hac nebula significaret Deus, è vestigio additur : *Impleuerat enim gloria Domini, domum Domini.* Atqui, Deus, qui ubiq; est, suaq; essentia, vtpotè indiuisibili, tota ubiq; nec partibus extensa omnia complet, nullisq; finibus concluditur, in terris per gratiam, in cælis per gloriam habitare dicitur, & habitat. Ex quo efficitur, eam cognitionis diuinæ gratiam, tum temporis & Salomoni, quem vnum ex multis, in suum cubiculû Dei sapientia introduxerat, datâ, & in templo illo, maximis Dei clementiæ monumentis consecrato, ut dicitur, trabali clauo fixam fuisse; quam vel Moysen Deum oculis & mente cernentē, vel Dauidem numine Dei ante alios prophetas afflatum, vel Paulum Apostolum, in tertium cælum raptum : vel Ioannem Euangelistam Christi Domini delicias, ab hominibus in Pathmos Insulam relegatum habuisse constat. ad quam quidem Dei cognitionis claritatē, licet illis Aaronicis sacerdotibus

propter nebulam veteris legis aspirare non licuit; tamen Christus, cuius infinitæ sapientiæ Salomon typum gessit, reiecto scissoque huius nebulæ velo, iis nouæ legis Sacerdotibus, qui ad montem, qui Christus est, maximis virtutibus niterentur, hæc tam admiranda sancta sanctorum patefecit. Inde illæ sanctissimorum hominum visiones: inde mentis excessus: inde raptus: inde extases: inde & illi ignes, qui, vt D. Ambrosius notauit, in patrum hostias descendebant. Quamuis autem paucissimis admodum, ad tertiū cælum, quo Paulus admirabili gratia sublatuſ erat, attingere sit concessum; tamen ad tertium cælum aspirantibus, in secundo vel in primo consistere, summa felicitas ducenda est. Hæ igitur sunt illæ nubes, quibus Deus maximam gratiam Salomoni ostendens, impleuit templum: hic est ille ignis, quem Deus è sublimi cælo in hostias Salomonis demisit: hi denique sunt illi oculi Dei, quos idem clementissimus Deus, in templo illo amplissimo à Salomone magnificè exædificato collocauit. Atque & illis verbis: *Et permaneant*, non solum oculi mei, sed & *cor meum ibi cunctis diebus* immensum quendam amorem, Salomoni declarauit Deus. Magnum est, si præpotens Deus, non vulgare aliquod sui in Salomonem amoris indicium dedisset: maius est, si non vulgare tantum, sed & insigne dedisset:

diffet : longè verò maximum est propeque infinitū ;
cū non indicia amoris sui, non aliqua præclara &
luculenta testimonia & argumenta , non deniq; su-
um amorem ; sed ipsummet cor suū (ò rem admira-
bilem) Salomoni temploque illius offert clementis-
simus liberalissimūque Deus. Quid enim ? an non
hac tanta liberalitate & munificentia, ipsum omniū
gratiarum , & totius liberalitatis fontem in templo
Salomonis aperuit ? illum, inquam, fontem, ex quo
Cherubimi, charitate flagrant : Seraphimi , sapien-
tia lucent : Throni , maiestate excellunt : Principa-
tus, dignitate præstant : Virtutes, admirandis signis
& prodigiis pollent : ex quo denique, in Potestates,
Dominationes, Archangelos, Angelos , omnesque
cæli ciues, singularis vis & potestas summaque præ-
stantia excellentiaque , veluti quibusdam immensæ
ac inexplicabilis gratiæ Dei riuis deducitur. Quid
enim in animante maius potest esse corde ? non pes,
non manus , non brachium , non auris , deniq; nec
oculus. Itaque cū nomine cordis, nec ipsa essen-
tia Dei intelligi potest ; hæc enim est vbique : nec
eius operatio ; hæc enim propter naturæ diuinæ
summam simplicitatem re & ratione eadem est cum
essentia Dei ; consequens est, vt nomine cordis ij ef-
fectus gratiæ Dei significantur , quos in cælo cle-
mentis. Deus, vbi corde & oculis habitare dicitur ;
ad im-

ad immensam infinitamque cælestium ciuium felicitatem efficere solet. Quid igitur mirum, si illæ beatæ mentes, quæ pompam & gloriam humanam, & id genus alia, in quibus curæ & cogitationes hominum consumuntur, despiciatui ducunt, vehementer miratæ sunt, cùm viderent maximis donis cælestibus ornatum, & in tam arctam amicitiam à Deo receptum, vt è cælis suum domicilium, & quod longè maius & admirabilius est, oculos & cor suum in templum Salomonis transferret, ibique collocaret? Egredere igitur, REX serenissime, & non solùm cū illis sanctis. Imperatoribus & Regibus, verùm etiā cum cælestis Hierarchiæ, Principibus, Cherubimis, & Seraphimis, vide Salomonē in diademate suo, in quo coronauit illum mater sua in die desponsationis illius. Sed de regni Salomonis præstantia sit satis.

Nunc quibus gradibus ad eam felicitatem ascenderit Salomon, diligentius inquiramus. Ex nullo autem, id melius cognoscemus, quàm ex hac eadē, quæ Salomonem coronauit, diuina sapientia: quæ non ideò nos tantùm ad spectandum Salomonem euocat, vt eius regium diadema admiremur; sed etiam diem nobis & tempus designat; in qua eundem sapientissimum Salomonem, regali corona redimitum Israël's vniuersi, omniumque gentium & nationum Regem dominumque creauit: IN DIE, inquit

inquit, DESPONSATIONIS ILLIVS, ET IN DIE
LAETITIAE CORDIS EIVS. Ac si apertiùs, hæc
eadem diuina sapientia, cùm nobis omnibus, quos
sancta Sion Ecclesia suo sinu fouet & complectitur;
tùm tibi, SIGISMVNDE REX, inter filias Sion præ-
clarissime, ad quem hæc mea præcipuè spectat ora-
tio, diceret, teque his verbis appellaret: Egredere ô
SIGISMVNDE REX dilectissime, & non solum
admirare splendorem regni Salomonis; sed etiam
diem nota in qua Salomonem mater sua Regem de
nunciauit: & tempus signa, in quo capiti eius tam
præstans imposuit diadema. Non enim illum coro-
nauit in illa die, qua ille idem Rex, maximorum Dei
beneficiorum oblitus, ac turpi fœdoque amore mu-
lierum excoecatus connubio huius pulcherrimæ, &
matris, & sponsæ suæ nuncium remisisset; sed in die
desponsationis illius, qua videlicet admirabili fide
& pietate illi eidem & matri & sponsæ suæ diuinæ
sapientiæ, sponsalia dederat, eamque sibi sanctissi-
mo matrimonij fœdere copulârat. Deinde, IN DIE
LAETITIAE CORDIS EIVS: illa, inquam, die, Sa-
lomonem regio honore affecit: cùm lætitia cordi il-
lius conuenientissima & propria perfunderetur: &
gaudio, quo diuinus amor, in quo solo veluti natu-
ræ suæ proprio & conuenienti loco, mens humana
conquiescit, pectus illius incenderat, exultaret in-
cre-

credibili: cùm in summi Regis cubiculum introdu-
ctus, tantum sanctissimo cælestis sapientiæ exarfe-
rat amore; vt alias virtutes, prudentiam, iustitiam,
fortitudinem, temperantiam, castitatem, humilita-
tem, diuinæ sapientiæ filias & comites his verbis
compellauerit: *Fulcite me floribus, stipate me malis,
quia amore eius languo.*

Atque vt has suauissimas Dei voces melius per-
spicias, totum Salomonis consilium breuiter & cla-
rissimè tibi proponam. Tria sunt, SIGISMUNDE
REX serenissime, quibus veluti quibusdā gradibus
in tam sublimem sapientiæ & felicitatis arcem Salo-
mon ascendit. Timor Dei, amor, & diuini cultus
ardens studium. illud secundum ex primo, ex his
autem duobus, tertium ortum habet. Nunquam e-
nim Salomon, nec adeò magnificum templum ex-
truxisset, nec extructum immensa auri, argenti,
gemmarumq; copia locupletasset, nec tam opimis
victimis altaria onerasset, nec sacerdotibus tantum
honorē habuisset; nisi timore Dei à peccato deter-
ritus, & ad Deum Opt: Max: tot tantisque benefi-
ciis prouocatus redamādum facibus diuini amoris
inflammatu & incensus fuisset. Sed vt tantarum vir-
tutum splendor & dignitas, clariùs nobis appareat,
de illis singillatim pauca dicā. Ac primùm de timo-
re Dei: quem & Isaias ob claritatem & præstanti-
am pro-

am prophetiæ, potiùs Iesu Christi Euangelista, quàm propheta à viris doctis appellatus, thesaurum Sionis, quam magnificauit Dominus, & Dauid Rex, & prophetarum princeps, & Salomon omnium mortalium sapientissimus, initium sapientiæ esse dixerunt: *Et erit fides in temporibus suis, diuitiæ salutis* Isa. 33. *sapientia & scientia, timor Domini ipse est thesaurus eius.* Tres autem præstantissimi testes, diuino spiritu afflati, in vnum encomium timoris Domini cōspirerunt, vt, cū in trino numero perfectio summa absoluatur, timor Domini maximam apud omnes habeat commendationem. Quòd si sapientes architecti magnificentiori ædificio extruendo, altiùs & profundius fundamentum subiiciunt, & cum timor Domini sapientiæ diuinæ, quæ felicitis & beatæ vitæ fontem continet, sit fundamentum; intelligimus faciliè, in pectore Salomonis, quod diuina bonitas immensa propè sapientia compleuerat, timorē Domini altissimè & profundissimè suas radices defixisse. Atque hoc quidem in actionibus Salomonis, & in ea gratia, quam Salomoni contulit Deus, non obscurè sacræ significant literæ: Recitabo ipsa sacrarum literarum verba: *Et nunc Domine Deus, tu* 3. Reg. 3 *regnare fecisti seruum tuum pro Dauid patre meo, ego autem sum puer paruulus, & ignorans egressum & introitum meum, & seruus tuus in medio est populi, quem*

elegisti, populi infiniti, qui numerari & supputari non potest præ multitudine. Dabis ergo seruo tuo cor docile; ut populum tuum iudicare possit, & discernere inter bonum & malum. Quis enim poterit iudicare populum istum: populum tuum hunc multum? Placuit ergo sermo coram Domino, quod Salomon postularet huiusmodi rem. Et dixit Dominus Salomoni: Quia postulasti verbum hoc, & non petisti tibi dies multos, nec diuitias, aut animas inimicorum tuorum; sed postulasti tibi sapientiam ad discernendum iudicium, ecce feci tibi secundum sermones tuos, & dedi tibi cor sapiens, & intelligens in tantum; ut nullus ante te similis tui fuerit, nec post te surrecturus sit. In quibus diuinarum literarum verbis, duo videmus: alterum est timor Salomonis, & animi summissio & humilitas, quæ ex timore Dei, tanquam sapientiæ principio exoritur: Nosse enim seipsum, etiam ipsi philosophi non paruam sapientiæ partem esse iudicauerunt: alterum est propter timorem Domini, & animi summissionem, omnes illas, & animi, & gratiæ, & fortunæ opes Salomoni diuinitus concessas esse. Satis autem apertis verbis ostenditur, ob timorem Domini, & animi summissionem eam felicitatem Salomoni obtigisse, ut omnibus liquidò constaret, timorem & humilitatē Christianam, summam Dei gratiam hominibus conciliare: Quia, inquit ipse clementiss. Deus, postulasti

verbum hoc, et non petisti dies multos, nec diuitias, aut animas inimicorum tuorum; sed postulasti tibi sapientiã ad discernendum iudicium, ecce feci tibi secundum sermones tuos. Atq; vt id quod in se planum est, omnibus perspectum fiat, rem ipsam paulò diligentius perpendamus. Sunt enim quidam homines, qui, vt timorem Domini in pectoribus Christianis extinguerent, vt ita scelerum omnium sylua succrescente sapientiæ segetes interirent, in nulla re magis elaborant, quàm vt mentibus humanis eam opinionem infererent; omnia salutis & diuinæ sapientiæ bona in sola fide reposita esse: timorem autem Domini, ad quasdam consequentias reiiciunt. neque enim audent apertè, quod insanus Lutherus fecit, veritati contraire; sed callidè timori Domini neruos incidunt. Sic enim existimant euenturum, vt timore Domini vel extincto penitus, vel pessimis rationibus instituto, omnem sapientiæ Dei fructũ inuecta calamitate peruerterent. Contra quos ego hoc loco disputationem nõ instituã, sed tantũ illorum errorẽ breuiter coarguam, ne illorũ falsa & perniciofa doctrina, timoris Domini splendor obscuretur; & homines hoc primo gradu ad sapientiam deiecti, & tetrìs tenebris ignorantia inclusi, à vera felicitate, quæ in sapientia & rerum cælestium cognitione sita est, perpetuò exularent. Ac ne rem facilem expli-

cando, eandem (vt dicitur) sapius oberremus chor-
dam : quid sit causa rei, quid item consequens vide-
amus. Causa id esse definitur ab omnibus, propter
quam aliquid fit : quæ, cum duplex sit extrinseca, vt
efficiens & finis; & intrinseca, vt materia & forma,
ad intrinsecæ causæ rationem illud addendum est,
qua sublata rem illam, cuius est causa interire neces-
se est. Consequens autē est, ab extrinseco adueniens
accidens, & quod adesse & abesse potest, citrà, eius
rei cuius est consequens corruptionē : quemadmo-
dū candor in cygno, & nigror in coruo. hæc enim
non tanta necessitate cum essentia & natura vin-
cta astrictaq; tenentur, vt sine iis natura esse non possit.
His ita cōstitutis, quæ omnibus, qui vel primis labris
sapientiæ rudimenta delibârunt, sunt notissima, quid
horū sit timor Dñi & humilitas, nēpè an sine iis gra-
tia Dei, in qua summa felicitas consistit, esse possit,
nec nē, ex diuinis literis apparebit. Si enim non pro-
pter timorem Dei, & animi submissionē, illa admi-
rabilis sapientia, cum qua omnia bona Salomoni ve-
nerunt, concessa est, causa cecidimus : vicerunt ad-
uersarij. Sin autem propter timorē Dei, & animi
submissionē, illam Dei gratiam & Salomoni & aliis
exhibitam à Deo esse, diuina oracula docebunt : an
non procerui & amentes illi habendi erunt, qui,
cum & causam id esse dicant, propter quam aliquid
est, &

est, & sine qua rei natura conseruari non potest, & ex Dei oraculis sciant, propter timorem Dei, gratiā hominibus donari, nec eandem sine timore Dei cōseruari posse; nihilominus timorem Dei causam gratiæ diuinæ negabunt; consequens esse contentent? Quid autem est aliud, album dicere nigrū, & nigrū album; & quod est in prouerbio, eodem ore sorbere & flare, si hoc non est? Et quoniā expresso verbo Dei totam suæ fidei doctrinam metiuntur: primū ab illis quæro, vbi diuinis literis expressum est, sola fide homines saluari: ostendant, obsecro, nobis, in hoc suo, vt dicunt, clarissimo Euangelio, aliquem sine timore Dei, gratiam & iustitiam Dei consequutum? Proferant aliquem Pharaonem, vel Nabuchodonosorem, propter superbiam & elationem animi cælestibus donis cumulatum, & animi tumore & impietate, vt quondam Eliam diuino amore flagentem, igneo curru in cælum euectum esse? Verant se in quamcunque partem aduersarij, omnes sacros libros euoluant, nullibi tamen reperient, aliquem impium, vel ob reiectum timorem Dei, vel sine timore Dei, iustitiæ diuinæ ornamenta à clementissimo Deo obtinuisse: illud tantū apud Dauidem Regium prophetam scriptum reperient: *Vidi impium superexaltatum & eleuatum, sicut Cedros Libani: & transiui, & ecce non erat, & quæsiui eum, & non*

Psal. 37.

est inuentus locus eius. Itaque homines impios inani pompa gestientes , ac diuitiis , & opulencia elatos tumentesque , idque temerè , & ad punctum temporis (*Quidenim est vestra vita ?* inquit Iacobus Apostolus , *vapor est , ad modicum parens , & deinde exterminabitur*) in diuinis literis ostendere poterunt.

Iacobi 4

At verò ob repudiatum timorem Dei & Christianæ virtutis officium violatum , aliquem ad Dei gratiam & amicitiam admissum esse , ostendent nunquam. Nos verò ex diuinis literis , Sole clariùs , ostēdemus , propter timorem Dei , homines diuinam iustitiam adipisci ; & sine timore Dei , ad gratiam , ad sanctitatem , ad iustitiam , ad illam æternam & beatissimā vitam aditum patere nemini. Expendamus aliqua

Eccl. 1.
Psal.

sacrarum literarum testimonia : *Qui sine timore est , iustificari non potest. Time te Dominum omnes sancti eius , quoniam non est inopia timentibus eum.* Ideò in-

Eccl. 1.

quit S. David , *Time te , quoniam non est inopia. Timor Domini delectabit cor , & dabit lætitiā & gaudium in longitudinem dierum.* quam lætitiā ? subiungit : *Timenti Deum bene erit in extremis.* Atqui si causæ rationem spectemus , maior quædam vis inest in verbo , Do , quàm in verbo , Propter : cùm illud causæ efficientis , & finalis & formalis videatur esse proprium ; hoc verò etiam in causas (vt vocant philosophi) sine quibus non conuenire potest. Sed
quid

quid verbis opus est ? Forma enim sapientum consensu, existentiam, operationem, & vitam rebus largitur : ob idque ab Aristotele εὐτελέχεια, seu vt alij volunt εὐσελέχεια appellatur : id est, rei perfectio ; & vt schola philosophorū loquitur, actus : aut quod altero verbo exprimitur, res qua continuæ quædam perennes motiones fiunt, seu ipsa motio continua & perennis. Cū igitur timor Domini fons vitæ, corona sapientiæ, plenitudo sapientiæ, radix sapientiæ, corona exultationis, lætitia, diuitiæ, gloria, gloriatio, & vita ad extremum ipsa in sacris literis dicatur ; sequitur profectò necessario, timorem Dei in constituenda iustitia & sanctitate, quæ vera vita est hominis, formæ rationem & naturam possidere. Expressa sunt in sacris literis ea de re testimonia :

Timor Domini fons vitæ, vt declinet à ruina mortis. Prou. 14
Corona sapientiæ timor domini, replens pacem, & salutis fructū. Plenitudo sapientiæ est timere Deum, & plenitudo à fructibus illius: omnem domum illius implebit à generationibus, & receptacula à thesauris eius. Eccl. 1.
Radix sapientiæ est timere Dominum ; nūmi enim illius longæui. Timor Domini gloria & gloriatio, & lætitia, & corona exultationis. Finis modestiæ timor Domini, diuitiæ, gloria, & vita. Prou. 22.
 Expecto quid isti ad ea respondebunt, qui timorem Dei ex essentia & visceribus iustitiæ Christianæ & sanctitatis euellunt,
 & in

& in ordinem consequentiarum & accidentium redigunt. An negabunt timorem Domini, coronam plenitudinem, & radicem esse sapientiæ, fontem vitæ, & ipsam vitam? at hoc est diuinas literas reiicere, & ipsius testimonio Dei falsitatis notam inurere. Non credo tantum facinus illos animo designaturos, & tam repente, velut Circeo poculo, ex purissimis Euangelicis, in Scythas & Turcas incredulos transformandos iri. Pugnabunt igitur cum philosophis, & formam operationis & existendi principium, rei que perfectionem negabunt. at hoc est naturæ rerum bellum indicere, & rationem ipsam & apertam veritatem stultissimis cuniculis oppugnare. Sed intermissa subtiliori disputatione, videte quantum sit inter nos & illos discrimen. Nos de

Eccl. 1. timore Domini (nam *in timore Domini fiducia est.*) illud cum Salomone usurpare possumus: *Respicite filij nationes hominum, & scitote, quia nullus sperauit in Domino & confusus est. Quis enim permansit in mandatis eius, & derelictus est? aut quis inuocauit eum, & despexit illum? Quoniam pius & misericors est Deus, & remittet in die tribulationis peccata, & protector est omnibus exquirentibus se in veritate.* Illi verò, qui suis consequentiis timorem Domini, virtutesq; alias abiecerunt, & in sola fide totius salutis iustitiæ, & sanctitatis præsidia constituerunt, quod patrocini-

trocinium sceleri & impietati (vbi enim timor Dñi non est, impietas est) ex diuinis literis afferent? an dicere poterunt: Respicite filij nationes hominū, & scitote, quia nullus quamuis maximis flagitiis coopertus, fide tamen nuda & sola in Christum conuersus, sperauit in Domino & confusus est? Minimè verò hoc diuinarum literarum autoritate freti dicere poterunt. Nunquam enim eas laudes impietati diuinæ tribuunt literæ. imò verò illud ex Salomone audient: *Væ duplici corde, & labiis scelestis, & Eccl. 10. manibus malè facientibus, et peccatori ingredienti terram duabus viis. Væ dissolutis corde, qui non credunt Deo, & ideo non protegentur ab eo. Væ his, qui perdidierunt sustinentiam, & qui dereliquerunt vias rectas, & diuerterunt in vias prauas: & quid facient, cùm inspicere cæperit Deus?* At dicunt isti, solius Dei misericordia, quæ nobis per mortem Iesu Christi ostensa est, nos saluari & iustitiæ opibus ditari. Quasi vero, Ecclesia Catholica, ita ad Dei timorem, aliasq; virtutes salutem & iustitiam nostram referat; vt ex earum societate, gratiam Iesu Christi & clementiam exterminandam putet! Nam cùm à Salomone edocti, Timorem Domini coronam esse sapientiæ, replentem pacem, & salutis fructum firmissimè credimus; simul illud, ex eodem Salomonis libro, ad eam fidem adiungimus: *Utique autem sunt dona Dei.*

Phil. 2. Neque illa nos latent : *Deus est enim, qui openitur in nobis, & velle & perficere, pro bona sua voluntate.*

1. Cor. 15. *Gratia Dei sum, id quod sum. Sine me nihil potestis*

Ioan. 15. *facere. Nemo dicit Iesus, nisi in spiritu Dei. Itaque cum Dauide propheta dicimus : Vniuersæ viæ Domini misericordia & veritas. Verum cum istis viis Domini ad cœnam illam magnam, à Deo patre per Iesum Christum paratam, adducimur, consilium Iesu Christi Dei, & Doctōris nostri secuti, nō in primo, sed in nouissimo loco, quod humilitatis & timoris Domini est, nobis recumbendum esse existimamus. recumbendum autem, non vt ibi otiosi simus, tantumque conuiuarum dignitate & splendore, virtutum gemmis vndique coruscante, oculos pascamus; sed vt tenuitatis & imbecillitatis nostræ cōscij, identidem memoria repēcentes, illud tremendum verbum : *Amice ad quid huc intraſti, non habens vestem nuptialem ?* quemadmodum D. Paulus admonet, cum timore & tremore nostrā salutē operemur. Non*

Phil. 2. enim gratia Dei, ad id nobis donatur, vt simus sine vita & sine spiritu; sed vt vitam cœlitū viuiamus : non vt accepta gratia virtutē, quæ in actione consistit debilemus; sed vt eam ad benè sanctēq; agendum exacuiamus. Gratia enim Iesu Christi, non hominis naturam euertit; sed reparat : non vita hominem priuat; sed donat : non excœcat; sed illuminat:
non

non virtutem extinguit ; sed perficit & excitat : non voluntati libertatem arbitrij eripit ; sed illi eam vim tribuit, vt facillimè pietatis & sanctitatis officio animum excoleret : non coacta ; sed libera : alioqui amissa libertate , non hominis voluntas esset ; sed iumentorum sensus, aut potius lapis & truncus: atque ita nullo pacto in illorum sanctorum numerum venire posset , in quorum laudibus illud ponitur : *Qui cum potuit transgredi, & non est transgressus.* Quibus Eccl. 31. verbis, an non Sole clariùs, homines sancti ita opibus gratiæ Dei abundare significantur ; vt si velint virtutis , & Christianæ religionis officium tueri ; & contrà omnia illius repagula, conuellere & perfringere possint? Atq; & illud manifestum est, hominibus Dei, nō ita gratiam diuinam infundi, vt omnes penitus illorum actiones absorbeat. Primò, quia in hoc Salomonis testimonio, homo nō esse transgressus dicitur ; non Deus. Deinde, quia S. Paulus homines sanctos , adiutores Dei appellat : *Adiutores*, inquit, *sumus Dei.* Mitto nunc alia breuitatis studio diuinarum literarum testimonia. Verùm, si gratia Dei ita omnia in homine occupauit ; vt nullum penitus locum actioni humanæ reliquerit : quomodo obsecro, S. Paulus homines sanctos , adiutores Dei appellare potuit? Quomodo enim is, qui nihil iuuat, adiutor dici , & esse potest ? aut si iuuat , vt adiutor

Phil. 2.

dici possit, quomodo nihil agendo iuuat? Hæc ita plana sunt, vt constet eos, qui hæc non percipiunt, non ratione duci, sed horribili mentis cœcitate rapi. Quamobrem timor Dei, & donum Dei est, & opus nostrum. Dei donum est: *Deus enim est, qui operatur in nobis, velle & perficere pro bona voluntate.* nostrum autem opus est; quia nostra voluntas, cum Dei dono & actionibus, quæ operantur in nobis, velle & perficere, ita iuncta & copulata est; vt propter illius arbitrij libertatem, qua Dei dono & actionibus assensum præbere potest, & negare, adiutores Dei nominemur, & simus. Cæterum, vt assensum nostrum vocibus diuinis, quibus ad vineam Domini labore & studio excolendam inuitamur, negemus, ad easque obsurdescamus, nos Sathanas per suos satellites monet & hortatur. Vt autem vocibus Dei sanctissimis obtemperemus, ipsemet clemētissimus Deus, hac suaui oratione, omniq; amore & beneuolentia plenissima, nobis persuadere conatur: *Venite*

Psal. 33.

filij audite me, timorem Domini docebo vos. Imò verò non tantum vocat; sed etiam ipse ad nos veniens, & ad nostri pectoris ostium assitens pulsatur, illius domicilium introire paratus. Si tamen ostium nostri pectoris clausum, illi à nobis fuerit patefactum. Ita enim ipse apud Ioannem loquitur: *Ego sto ad ostium*

Apco. 3.

& pulso, si quis audierit vocem meam, & aperuerit ianu-

ianuam, introbo ad illum, & cœnabo cum illo, & ipse mecum. Qui vicerit, dabo ei sedere mecum in throno meo; sicut & ego vici, & sedi cum patre meo in throno eius: qui habet aurem audiat, quid spiritus dicat ecclesiis.

Sed iam videamus, quomodo Salomon, ad suauissimas Dei voces, quibus homines ad capeffendâ disciplinam timoris sui inuitat, non surdus, hac eadem diuina doctrina timoris Dei animum suum excoluerit. Neque enim illum vulgarem timorem Dei fuisse necesse est; qui Salomonem in tam alto gratiæ & gloriæ diuinæ gradu collocauerat. Grauiissimas pœnas luit homo ille Euangelicus, in lautissima Domini cœna nulla amictus veste nuptiali. Quid enim acerbius, quid tristiùs, quid calamitosius illa voce cogitari potest? *Amice ad quid hic intrasti, non habens vestem nuptialem?* Atqui in illo apparato cœlesti conuiuio, ad quod etiam claudos, surdos, & cœcos, diuina bonitas inuitauit, inuitat-que, præter hunc vnum, hac terribili seuerissimi iudicis voce damnatur i.emo. Quid ita? Quia timore Dei, metuq; repudiato, se in illorum numerû, qui in conspectu maiestatis diuinæ, suam cum timore & tremore operantur salutem, aggregauerat. Quòd si apud æquissimum iudicem Deum, vt audacia & superbia hominibus pœnas accersit; ita humilitas

Matt. 22.

& timor Domini gratiam conciliat ; profectò maximum & immensum illū timorem Salomonis fuisse necesse est,quem tanta gratia clementissimus Deus est persecutus:vt,quemadmodum in illo homine attritis, laceratisque vestibus in cælesti cæna reperto, maximæ seueritatis ; ita in Salomone, summæ benignitatis & clementiæ exemplum ediderit, omnibusque ad imitandum proposuerit. Neque verò hæc tanta gratia Dei, & liberalitas Salomoni collata, in alias potiùs virtutes, quàm in humilitatem & timorem Domini referenda esse videtur. Hæc enim virtus , humi repentes in altum dignitatis gradum extollit , & vt cum propheta loquar , de stercore erigens pauperem, cum principibus collocat : hæc diuinum numen scelere violatum placat ; hæc afflictis est solatium , miseris perfugium , pereuntibus portus:hæc deniq; vna, inter alias virtutes, Deo est gratissima. Quod ita se habere , ipse præpotens Deus apud Prophetam clarissimis verbis ostendit : *Ad quem*, inquit, *respiciam, nisi ad humilem & trementem sermones meos?* O magnā vis timoris Domini. Legimus in psalmo Davidis, oculos Domini esse super iustos ; sed non legimus : oculos Domini non nisi super iustos esse. At verò hîc , ex Deo ipso clementissimo audimus ; illum non solùm eos, qui ad sermones eius contremiscunt, sed etiam non nisi hu-
mile

miles corde, & trementes sermones ipsius, benignè & clementer aspicere solitū. O miram timoris Domini vim & præstantiam, qui ita inter virtutes lucet splendetque; vt tanquam in ornatu, vesteque pretiosa splendidissima gemma; ita ipse diuinæ maiestatis oculos maxima afficiat voluptate! Cui enim aliquando virtuti eam laudē diuinæ literæ tribuerunt, vt ipsa vna cæteris, quasi posthabitis, & certo nomine suppressis, clementissimi Dei oculos in se conuerterit? Meritò itaq; Salomon sapientissimus cum vno aspectu omnium præstantiā excellentiamq; virtutum intueretur, & quæ cæteris omnibus præstaret diligentius apud se perpenderet; tandem timori Domini his verbis concessit palmam: *Timor Domini super omnia*. Quamobrem ex his concludendum est, cum alias virtute, potissimè tamen timorem Domini, Salomonem in gratia Dei posuisse: ex eo autem, quòd Deus iustissimus, reddat vnicuique, vt Propheta loquitur, iuxta opera sua, & munera donaque cælestia, meritis hominum, quasi quibusdam librata ponderibus elargiatur, illud efficitur; eundē æquē iustissimum atq; clementissimū Deum, omnia illa maxima sua beneficia, immensaq; suæ gratiæ opes, ob summum quendam, & incredibilem timorem diuinum, in Salomonem contulisse.

Psal. 13.

Verum hæc ipsa, in Salomonis actionibus specte-
in se

mus: ne ea, quæ in se sunt clarissima, coniectura tantum assequi videamur. quanquã non vsus sum verbo, quo debui. Nõ enim coniectura appellanda est testimoniũ Dei; sed certissimum argumentũ. Deus enim intima voluntatis humanæ consilia perscrutatur: & quæ difficultatum latebris natura occultauit, & ab oculis sensuq; hominũ remouit; ea præpotenti Deo patent, in promptuq; sunt omnia. Itaq; vt hominũ notitia de intimis cogitationibus coniectura est; ita Dei omnia perspicientis, certissimum argumentum. Sed tamen, vt nos quoque in ea ipsa, quæ testimonio Dei sunt certissima, oculos inferre possimus, eaq; clarissimè intueri; ac rem aciem in omnes Salomonis actiones intendamus. Vide igitur tu in primis, SIGISMUNDE REX, Regem Salomonem: iuuenis, iuuenem: quid ad clauum regni Israëlitici collocatus, regaliq; coronâ sedimitus faciat: in quo spes suas figat: quid timeat, & quomodo: quem finem regnandi omniumq; actionum sibi proponat. Et quoniam finis licet sit vltimus in executione, primus tamen est in animo sapientis, estq; omnium actionum humanarum causa, prima & maxima, hominẽ ad agendum impellens; ideò primũ omnium, intuerẽ, quem regnandi scopum sibi Salomon constituat, in eumq; animo & cogitatione defixus, omnes suas ad eum dirigat actiones. Quem igitur in
hoc

hoc amplissimo regno scopum Salomonis esse existimabimus? nempe eum, qui & regno utilissimus esset, & illi ipsi conuenientissimus. Porro sapienti & cordato viro, præter ipsum summum bonum, nullus alius finis conuenire potest: cum non nisi in summo bono, animus hominis conquiescat. Iustitia verò & æquitas, nerui sunt atque artus Reipub. Sunt enim ad rectè gubernandam Rempub. ita necessaria; vt nec illi quidem, quod M. Tullius prudentissimus Senator obseruauit, qui maleficio & scelere pascuntur, possunt sine vlla particula iustitiæ viuere. Quis autem adeò demens est, qui non inprimis summum bonum, veramque & stabilem felicitatem sibi esse expetendam putet: eaque omnia, quæ in illius possessionem ducunt, auidissimè persequatur? Natura enim comparatum est, vt bona appetamus, mala fugiamus. Sed opes & fortunæ voluptatumque illecebræ, plerumque sensum hominibus eripiunt: & quemadmodū cæcus ex altissima rupe præcipitatus, non ad eum, quem velit, fertur locum, sed ad quem pondere deprimitur; ita diuitiæ & voluptates, hominis superbi & amentis animum conturbant; vt non sit aptus ad exequendum munus suum. Cum verò Salomon contra hos omnes, virtutis & veræ felicitatis hostes, superior fuerit: neque enim illum regnandi initium maxima rerum omnium co-

3. Reg. 3.

pia abundans, ab summa integritate continentiaq; deduxit; tametsi de hac optima ipsius voluntate, nihil consignatum in sacris literis haberemus; tamen ex illius sapientia & pietate, facile coniiicere possemus; eum, cum regni Israëlitici clauum tenere coepisset, in solo bono & æquitate suis actionibus finē defixisse. Verūm satis disertis verbis ipsemet sapientissimus Salomon, in suis ad Deum precibus significat, se non alium finem, cum esset regnum Israëlis adeptus, spectauisse. Verba sunt Salomonis: *Dabis ergo seruo tuo cor docile, vt populum tuum iudicare possit, & discernere inter bonum & malum.* Paucis verbis Salomon, & finem, & ea, quæ consequuntur finem complexus est. Nam in causis rerum, bonum est finis. Bonum autem illud, quod præpotens Deus, cum aliis rebus, tum humanis actionibus finem destinauit, est summum bonum & ipsemet Deus. Atqui hîc Salomon, non alterius boni cognitionem à Deo expetit; quàm illius, ad quod, cum homines magno excelsoque animo contendunt, singularem apud Deum gratiā ineunt; & à quo, cum deflectunt, ingentem in se Dei concitant iram. Hinc est, quod Salomon non boni tantum, sed & mali cognitionē sibi dari postulat; nempè vt & bonum sequi, & malum vitare possit. Et quoniam in expetenda cognitione boni & mali Salomonem Deo plurimum placuisse

cuisse videmus : illud autem certum est , neminem , qui in suis actionibus , alium finem , præter Deum , intueretur , Deo gratum esse posse ; necessario profectò concluditur , Salomonem nullum alium præter summum bonum , sibi in regnando proposuisse finem , in illius contemplatione , mentem cogitationesque demersisse , ad eumque consequendum omnes suas actiones instituisse. Egredere igitur , Ô REX SIGISMUNDE , & non solum vide Salomonem in diademate suo ; sed etiam causam apud te expende , propter quam mater sua , tam præstanti diademate illum coronarit ; vt pij sapientisq̃ue Salomonis vestigiis insistens , primùm ad sapientiam & summam felicitatem facias gradum. Verùm , cùm animus desiderio summi boni inflammatus , non ab humanæ naturæ viribus proueniat ; sed ex fontibus diuinæ gratiæ in homines redundet ; eamobrem eiusmodi animus in cælum erectus , solamque Dei gloriã spectans , est tibi à clementissimo Deo sapiùs magnoq̃ ; conatu expetendus , illa eadem precatōnis , à Salomone edita , forma . quam quidem non humanam , sed diuinam esse , illud est argumento : quòd immensas cælestis gratiæ opes , ita à diuina liberalitate obtinuerit ; vt illius feruor , non solum cælum penetrâsse , verùm etiam in venis medullisq̃ue , Dei clementiæ & benignitatis infedisse videatur. Magna sunt &

diuina in ista precatione, omnia, nullaque vox in ea personat, quæ non odorem Deo suauissimum exhalaret, & quæ tua regia dignitate, singularique pietate, non esset dignissima. Atque illud quidem inter cætera, cum in ea precatione audis, Salomonem à clementissimo Deo notitiam boni & mali ardentè efflagitare, non est hoc in eum sensum accipiendum; ac si Salomon omnis cognitionis boni & mali expers fuisset; cum animus hominis rectè à ratione informatus, rem penitus ignotam nullo modo concupiscat; sed in eo & ardens boni & mali cognoscendi studium, & magna quædam humilitas, ac animi summissio nobis admiranda, atque in vita & in moribus imitatione exprimenda, venit. Ad studiū quidem Salomonis pertinebat, non antè in cognitione boni & mali conquiescere, quàm rem tantam & salutarem, quantum satis est ad benè beatèque viuendum animo comprehenderet: & ut non solum in genere sciret, quid bonum, quidue malum esset; sed etiam, ut in omnibus actionibus bonum à malo discernere posset: ne vel in augenda Dei Opt: Max: gloria, regni que Israëlitici commodis, aliquid ad rem spectans præteriret: vel in iudicandis hominum causis, ignorata æqui & iniqui ratione, alicui iniuriam inferret: atque ita in Deum clementissimum, qui damna iniuriasque miserorum in se suscipit, gra-
uiter

uiter peccaret. Illud verò ad magnam humilitatem Salomonis, & animi submissionem referri debet: cum in re non malè cognita & perspecta, suam prodit ignorantiam. Est enim hoc sapientum virorum proprium; vt, tametsi doctrina aliis antecedant, præclarumque multarum rerum scientiam sint adepti; tamen quòd in absolutam & perfectâ altissimorum causarum cognitionem non peruenerint, se ignorare, & nihil scire profiteantur. Stulti contrà, cum ipsa rerum caligine & ignorantia sint vndique circumfusi; tamen in media veritatis luce, se versari arbitrantur. An non Socrates aliis sapientia gloriantibus, suumque nomen, artium maximarum laude celebrantibus, illud tantum se scire, quòd nihil sciret ingenuè est professus? Atqui is oraculo Apollinis sapientissimus est iudicatus; tantum abest, vt illis, qui suam eruditionem venditabant rerum cognitione & scientia, fuerit inferior. Utinam verò in rerum diuinarum cognitione, tantum progressum faceremus; quantum Salomoni in his suis ad Deum fuis precibus, se ignorare confitetur. Non habuit Salomon, tam sublimem, de summo bono & vltimo fine notitiam, cum regni Israëlitici gubernacula tractare cœpisset; quanta illa fuit, cum esset diuina illa summaque sapientia à Deo collustratus: at eam habuit; vt in honore regio maximaque dignitate, De-

um inprimis timendum, & ex illius voluntate omnia facienda esse statueret. Non erat tanta rerum diuinarum intelligentia præditus, vt sciret quid ageret Deus, & quid de sua vita & salute decerneret: at tanta præditus fuit, vt sibi certissimè persuaderet, Deum, quid ipse ageret, quas animo cogitationes susciperet, quo voluntatem inclinaret, clarissimè intueri. Non potuit denique obtutu mentis suæ, tam clarum diuinæ naturæ lumen videre; vt quondam Lucifer ille, qui, vt Isaias loquitur, manè oriebatur & vulnerabat gentes, videbat: at tantum videre potuit, vt iudicaret, in conspectu Dei cernentis omnia, magno cum timore & humilitate versandum esse: nihilq; quod illius oculos offenderet agendum, cogitandumque. Magna vis timoris Domini: magna summissi animi & humilitatis: magna item vis superbiæ & arrogantia: magna tumidi inflatiq; animi & audaciæ; sed vtrunque magnum, magno cum discrimine. Superbia enim & proiectus, ad audendum animus, Luciferum è sublimi cælo ad profundum inferni chaos deturbauit: humilitas & timor Domini, Salomonem summis virtutibus & sapientia, in cælum euexit. Illa Luciferum ab aspectu Dei iucundissimo reiecit; hæc Salomonem ad familiare iucundumque, cum Deo colloquium, claramq; illius visionem & admirabilem admisit. Illa cum ma-

gna

gna summi boni cognitione, ornamenta cælestia & diuina Lucifero dissipauit; hæc cum parua vel mediocri eiusdem summi boni notitia, summas opes Dei gratiæ & cælestis sapientiæ Salomoni parauit. Itaque, si ex effectu causæ ponderandæ sunt: magnâ in Lucifero summi boni cognitionem, cum superbia & audacia copulatam, paruam aut potius nullam; exiguam autem Salomonis de Deo scientiam, timore Dei & humilitate, veluti vallo quodam contra rapinam sceleris & impietatis munitam, insignem admirabilemque iudicandam esse.

Facile autem ex ea summi boni cognitione, intelligi potest, quid Salomon agat, quid faciat, in quo perficiendo curas & studia sua consumat. Primum enim, illud eum facere necesse est, quod finem propositum, hoc est, summum bonum intuens, sibi faciendum animo designauit. Ea enim est humanæ mentis natura; vt nihil agat, quod non prius animo definierit: & quæ certo facienda definiuit, ea studio & diligentia constantissimè persequatur. Finis verò, & summi boni ratio, ea est; vt sua intelligentia ingens in animo cognoscentis, desiderium sui ingeneret: desiderium autem hominem ad actiones adipiscendi finē impellat: nec illum aliud quippiam, quàm quod ad consequendum finem plurimum facere videatur, agere permittat. Cùm itaq;

Salo-

Salomon cogniti finis, hoc est, summi infinitiq; boni, maximo desiderio teneatur; quid mirum, si regali dignitate initiatus, præter illud agat nihil, quod ad summi boni possessionem, Dei que gratiam consequendam viam sternat, aditumq; patefaciat? Ad consequendam Dei gratiam facit plurimum, rebus secundis non extolli, nihil sibi, omnia Deo tribuere. Itaque Salomon prosperis rebus non effertur, nihil sibi, omnia Deo tribuit, seipsumque in conspectu Dei abiicit, & despicit: non enim se Regem, sed servum; non virum nec iuuenem, sed puerum, & puerum paruulum appellat: *Et tunc*, inquit ipse Salomon, *Domine Deus, tu regnare fecisti servum tuum, pro David patre meo, ego autem sum puer paruulus.* Ad consequendam Dei gratiam & ultimum finem, plurimum confert, se non voluntate solum, sed & intellectu in conspectu Dei deiicere, & quasi in terram sternere. Itaque Salomon, non suæ prudentiæ laudes celebrat, sed imprudentiæ magnitudinem commemorat: non se scire, sed nescire boni & mali discrimen, dicit: doceri, non docere cupit: non denique ea omnia, quæ ad rationem administrandi regni pertinent, se probè tenere gloriatur; sed ingressum & egressum suum se ignorare coram Deo humillimè confitetur: *Et ignorans egressum et introitum meum.* Ad consequendam Dei gratiam & ultimum

num finem, multum interest, cor docile habere, & à corde obstinato, duro, & lapideo, quàm longissimè abesse. Itaque Salomon, non aurum, non gemmas, & lapides pretiosos, sed cor docile à Deo sibi donari vehementer exposcit: *Dabis ergo*, inquit, *seruo tuo cor docile*. Ad consequendam Dei gratiam & vltimum finem, maxima præsidia adfert diligens iustitiæ & æquitatis studium. Itaque Salomon in hoc potissimum elaborat, hoc magnis precibus à Deo efflagitat, vt quod munus proprium est iustitiæ, suum cuique reddat, nemini suo iudicio noceat, profit omnibus, omnia denique ex æquitate, & lege diuina iudicet & statuatur: *Dabis ergo seruo tuo cor docile, vt populum tuum iudicare possit*. Ad consequendam Dei gratiam & vltimum finem, in cognitione & magno desiderio eiusdem finis, plurimum positum est. Itaque Salomon, non aliud desiderat, quàm boni & mali notitiam: non aliud exoptat, quàm iustitiæ & æquitatis administrationem: non denique aliud à Deo sibi concedi tribuique postulat, quàm sapientiam: *Dabis ergo seruo tuo cor docile, vt populum tuum iudicare possit, & discernere inter bonum & malum*. & paulò post: *Et dixit Dominus Salomoni: Quia postulasti verbum hoc, & non petisti tibi dies multos, nec diuitias, aut animas inimicorum tuorum, sed postulasti tibi sapientiam, ad*
I *discer-*

discernendum iudicium: ecce feci tibi secundum sermones tuos, & dedi tibi cor sapiens & intelligens, in tantum ut nullus ante te similis tui fuerit, nec post te surrecturus sit. Egredere igitur, SIGISMUNDE REX optime, & vide Salomonem in diademate suo, cuius præstantia & splendor, non solum filias Sion admiratione, sed & ipsum clementissimum Deum maxima afficit voluptate. Eius enim sunt deliciae, esse cum filiis hominum. Sola autem pietas, sapientia, cæteræque virtutes, esse cum Deo faciunt, hominemque cum præpotenti Deo arctissimis amicitiae vinculis coniungunt.

Sequitur timor Domini, eiusque magnitudo. Is enim proximè sequitur, eas actiones, ad quas exercendas cognitus finis, homines maximo studio incendit atque inflammat. Sequitur autem eiusmodi actiones, non tempore, sed natura, ut philosophi loquuntur. Cognitio enim summi boni & finis, eodem temporis momento, homines & ad cōsequendum finem incitat, & eorum animis vehementem iniicit timorem; ne aliquid eorum studium adipiscendi finis interturbet. Imò verò, si diligentius naturam rerum inspiciamus, antè omnem actionem, illud sapienti viro, cognito fine, occurrit, ne aliquid agat quod noceat, & obsit. Verùm cum hoc summo bono & ultimo fini, ex euentu quodam accadat, eamobrem

eamobrem timor, quī natura, alias actiones sequitur, per accidens, vt philosophi loquuntur, easdem tempore, aut antecedit, aut simul eas concomitatur. Si enim, nec aliquod malum esset, quod consequendo fini obstaret; nec deinde alicubi auxilia extarent, quibus ad possessionem cogniti boni niti possemus; profectò in agendo nec mala formidaremus, nec spe aliqua sustentaremur. Solū enim malū metum incutit. quare si nullū malum extabit; omnis è vestigio metus interibit. Illud autē nullius spē aleret, in quo ad bene beatēq; viuendum nihil præsidij inesset. Quemadmodū ergo si mala omnia natura è medio tolleret, nullus metus homines terreret; ita si nullam opem ad felicem vitam, in hac vniuersitate rerum relinqueret, nulla spes hominum animi teneretur. Cū autē ad felicitatem aspirantibus, & multa mala se offerant, quæ incautos de felicitatis gradu deiicere, & è contra multa auxilia sese ostendant, quibus freti aduersa superare possent: inde accidit, vt homines & impendentia mala timeant, & in spem felicitatis inducantur. Vtrunque autem hominum actiones exacuit. Nam si nihil metuerent, remissiùs agerent; si autem nulla spe niterentur, obuenturum bonum, agerent nihil. Quamobrem regius Propheta, vtrunque hac sententia coniunxit: *Qui timent Dominum, sperauerunt in Domino, adiu-*

tor eorum, & protector eorum est. In quo illud animaduerfione dignum est, Daudem fpei præmiffisse diuinum timorem; vt ostendat, non nisi eos, qui timent Dominum, in aduerfis rebus fpe firma à præpotenti Deo auxilia expectare. Porro in timore Dei multi sunt gradus. Est enim timor alius alio maior. Si enim alicui mediocri obiicitur bonum, mediocri etiã timore, amittendi illius boni, exagitur. Stultus enim esset, qui propter amissum terenciũ magno se dolore cruciaret. Sin autem summum infinitumque bonum est, in quo consequendo vir sapiens sibi desudandum esse decreuit; immensum quoddã & propè infinitum malum iudicatur, quod illius conatum, lusceptosque labores eluderet. Ex huiusmodi autẽ impendentis mali consideratione, ingens timor in eius animo exoritur, qui maximo desiderio summi consequendi boni exarsit. Amens enim esset, qui in summi boni amissione, non sibi vehementer timendum esse existimaret. Hæc cùm ita sint, facile ex his sapientis Regis timor eiusque magnitudo apparebit. Quod enim bonum consequendum sibi proponit Salomon? summũ infinitumque. Igitur malũ non mediocre; sed summum propèque infinitum illud esse iudicat, quod illi tanti boni possessionem eripere posset. Ex quo concluditur, ingentem timorem illum fuisse, qui Salomonis, in consequutione summi boni maxima ma-
la &

la & impedimenta considerantis, tenerimum pe-
ctus percellebat. Adde animi & corporis virium,
magnam imbecillitatem: quæ iter lubricum, & dif-
ficilè reddit ad benè beatèque viuendum. Quæ in
se Salomon considerans, meritò se esse puerum, &
puerum paruulum confitetur. Quid illud, cùm, quò
sit ingrediendum, aut egrediendum ignoratur? An
non vel solæ tenebræ, in lucem emergere cupienti,
& in tenebricosissimo carcere, plenoque cauernis
& anfractibus, quò sit iter tenendum ignoranti, ma-
gnum timorem incutiunt? & vnde quaque improui-
sas & horribiles formidines animo illius immittunt?
At Salomon, in huius vitæ tenebricosissimo carce-
re, plenoque anfractibus periculosissimis, se ingres-
sum & egressum suum ignorare conqueritur: & suis
viribus omninò diffidens, ac impendentium malo-
rum metu vehementer perterritus, se totum ad De-
um, qui pro sua clementia nouit, diffidentes rebûs
suis confirmare, afflictos erigere, perditosque recre-
are, conuertit. Verùm ipsa Salomonis verba profe-
ram, vt in his, veluti in quodam speculo, Salomonis
timorem eiusque magnitudinem videamus: *Et nũc
Domine Deus, tu regnare fecisti seruum tuum pro Da-
uid patre meo, ego autem sum puer paruulus, & igno-
rans egressum & introitum meum, & seruus tuus est
in medio populi quem elegisti, populi infiniti, qui nu-*

menari et supputari nō potest, præ multitudinem. Intuere hīc paululū, REX serenissime, timorem Salomonis, his paucis verbis egregiè expressum. In medio populi infiniti Rex factus Salomon, illud timet ne regnando summū amittat bonū; magna iactura, magnus timor. Videt in amplissimo regno maxima salutis pericula, tot laqueos, tot impedimēta, exiguas & imbecilles suas vires: videt tot tantisq; malis superandis lōgè esse impares; hinc est quòd puerū, & puerum paruulū se dicat: videt breue tempus datū esse vitæ, longum præmio aut pœnæ: videt suam ætatem instabilem, animū mutabilem, omnia fluxa, incerta, & caduca: scit grauissima illi supplicia parata esse

Sap. 6. (*potentes enim potenter tormenta patientur*) qui in regendo sibi cōmisso populo aberraret: nescit introitū & egressum suū. egressum autem ex tot tantisq; periculis, & tam densis tenebris: & introitum, non ad quamvis lucem, sed ad lucem sempiternam, ad Dei gratiā, ad summam sempiternamq; felicitatē. Quid, an non in his omnibus ingens Salomonis timor perspicitur? Mihi verò, hæc omnia consideranti, non in minori timore Salomon sceptrū regium tenens, esse videtur; quàm ille apud D. Damascenum homo, vnicornem fugiens, & in horrendum baratrum incidens, esse debuit. dixi, esse debuit. Meritò enim tantis periculis & malis circumseptus, in magno timore esse

esse debuit. Sed quia imprudens erat, ob leuissimū vitæ huius solatiū, summi periculi timorem abiecit. Nam in periculo huius hominis, D. Damascenus, eorum stultitiam, oculis hominū proponit, qui sese ita huius vitæ voluptatibus dediderunt; vt nullam de morte, & de futura vita, cogitationē suscipiant. Sed quo isti stultiores; hoc Salomon, prospiciens futura, sapientior apparebit. Referam ad verbum eam præclaram similitudinem D. Damasceni, vt quantus timor fuerit Salomonis, aliquomodo videre possumus. Is enim stans in illa D. Damasceni basi, omnia intenta sibi pericula vehemēter formidat: *Qui præsentibus*, inquit B. Damascenus, *inbiant negotiis, & nullam habent futurorum memoriam, sed delectationē corporalem incessanter desiderant, similes esse arbitror homini fugienti à facie furentis vnicornis; quem dum fugeret, ne deuoraretur ab eo, incidit in banatrum; dum autem caderet, manibus extensis arbusculā quandam apprehendit, & fortiter tenuit, & in basi quadam pedibus impressis, visum est sibi in pace de reliquo fore & stabilitate. Respiciens ergo, vidit duos mures, album vnum, alterum nigrum, corrodes nadicem arbusculæ, & iam propè erat, vt abscinderent. In imo banatro, vidit draconem, aspectu terribilem, ignem spirantem, & deuorare eum cupientem. Intuens verò rursus basim illam, super quam pedes habebat firmatos, vidit qua-*

dit quatuor aspidum capita, de pariete prodeuntia. Eleuans autem oculos, vidit de rumis arbusculæ illius exiguum mel distillans. Dimittens ergo considerare quæ circumdederunt eum mala, seipsum dulcedini illius mellis tradidit. O stuporem mentis admirabilem! Ingens malum, mortem, cruciatû sibi imminere videt; & tamen qua ratione, ex tantis malis euadat nō cogitat. Iam iam ab immani dracone deuorandus est; & tamē mauult exigua mellis suauitate teneri, quàm immanissimi draconis os teterrimū euitare. O scelus, ô portentum in vltimas terras deportandum! Quod enim monstrû, quod portentum, Africa, monstrorum parens, huic simile vnquam edidit, ex tot tantisq; rebus inter se discrepantibus concinnatum? Si enim homo est; cur ratione non vtitur? si voluntatem habet; cur non bonum eligit, malum abiicit? si sensum habet; cur tantis malis non commouetur? Sed iam D. Damascenum hanc similitudinem explicantem audiamus. Clarissimè enim perspicimus, eos omnes, huic infano dementissimoque homini simillimos esse: quos cœca libido in seruitutem inanis gloriæ, & obscœnissimæ voluptatis mancipauit: *Hæc similitudo* (verba sunt B. Damasceni) *est eorum, qui seductioni præsentis seculi adhærescunt; cuius expositio hæc est: Vnicornis figuram tenet mortis, quæ semper persequitur genus humanum.* Bar-
trum

In histo:
Barlaam
& Iosa-
phat.

trum verò *mundus* est ipse, plenus omnibus malis & mortiferis laqueis. *Arbuseula* autem, quæ à duobus muribus incessanter incidebatur, quam apprehendimus vitæ nostræ mensura est, quæ consumitur & diminuitur per horas dici & noctis, & incisioni paulatim appropriat. Quatuor verò aspides, constructionem humani corporis ex quatuor elementis significant, quibus inordinatis compago dissolvitur. *Draco infernus* est, qui cupit suscipere eos, qui delectationes præsentis futuris præponunt. *Stilla* verò mellis dulcedinem significat, & delectationem mundi. Haftenus B. Damascenus, ut clarissimè, ita verissimè. Quis enim non intelligit, hæc tot tantaque pericula hominibus intenta esse? quis non videt, quotidie homines morbis vexari: infinitis malis affligi: incautosque, inopinatas, & horrendæ mortis fluctibus absorberi? Ergo stultus omninò & amens est ille, qui in tot tantaque mala coniectus, ex parva mellis portione leuamen querit; Salomon sapiens, qui ex summa Dei benignitate & clementia, solatia reportat. Verùm, si ex comparatione huius amentis hominis, à D. Damasceno nobis propositi, Salomonis pietatem & sapientiam spectare placeat; nihil erit in Salomone, quod illius actionibus vehementer non repugnet. Ille enim in maximis periculis, ad exiguam fluxamque illecebram voluptatis, tanquam ad summum bonum adhærescit; at

Salomon totus à Dei liberalitate & clementia pendet. Ille miser & deplorandæ calamitatis homo, iam iam à dracone teterrimo deuorandus, exigua voluptate, à contemplatione summi boni, extremique mali sese auertit; at Salomon in immensam Dei gloriam, æternamque felicitatem, ita mentem cogitationemque suam defigit; vt quamuis amplissimis honoribus abundet, ac omni Macedonum gaza potiatur; ea tamen omnia, quæ homines in terram depressi admirantur, vanitatem vanitatum esse pronunciet: maximè autem corporis voluptatem, in cuius regno virtus non potest consistere, iudicat indignam esse hominis præstantia. Ille vt se perderet, & præterita obliuione obruit, & futura non prospicit: non basis, in qua stat, infirmitatem videt: non baratri immensam voraginem aspicit: non draconem teterrimo ore grauissimum odorem & pœnas inferni inhalantem, ac corpori & animo suo inhiantem, considerat; at Salomon ne minima re Deum offenderet, atque ita consuleret vitæ & felicitati suæ, futura prospicit, nolque, vt ita faceremus, diligenter his verbis adhortatur: *Memento nouissima, & in æternum non peccabis.* Ille imbecillâ basim, tam firmum præsidium habere, tamque sartam tectam ab omni periculo putat, vt in vtranque aurem dormire videatur; at Salomon, magni Regis sanctique

Eccl. 7.

Pro.

Prophetæ filius, maximis pignoribus gratiæ Dei diuinitus acceptis; nihil tamen in tuto esse, sed omnia suspecta, omnia plena periculis arbitratur; adeò vt existimet amplissimo regno, non aliter atq; illa imbecilla basi pedes suos sustentari: ac proinde, quòd ingressum & egressum suum ignoret, maximo timoris cruciatu angitur. Illum stultitia & amentia ex altissimo gratiæ Dei domicilio deprimat, & in foedani voluptatem, omniumque bonorum desperationem demergit: at Salomonem sapientia & timor Domini, ad spem immortalitatis rapit. Scilicet ille, qui nò timet Dominum, non sperat in Domino; iste contra, qui timet Dominum, sperat in Domino. Quoniam verò vehementer, & timet Dominum, & sperat in Domino; ideò Dominus non solùm adiutor (placet enim verbis prophetæ uti) & protector, verum etiam maximus adiutor, & protector est illius: *Qui timent, inquit S. prophetæ, Dominum, sperauerunt in Domino, quoniam adiutor & protector eorum est.* Sit igitur ratum & fixum: eum, qui sperat in Domino, necessariò timere Dominum, & præter eum, qui timet Dominum, sperare in Dominum neminẽ. Manifestum est, Salomonem non solùm timuisse; sed & vehementer timuisse Dominum. Manifestum & illud, Salomonem in solius Dei clementia, omnem suam spem habuisse. Quantam verò spẽ, in hac

De benignitate & clementia, positam habuerit, breuiter expendamus. Amplissimum regnum Salomoni, reliquit potentissimus Rex Dauid, magnas opes, nullos hostes, maximum belli apparatus. Quid igitur? an in aliquo horum, aut in his omnibus, vitæ & felicitatis suæ præsidia Salomon collocauit. Minimè verò. Sciuit enim Deum, rerum etiam minimarum causam esse: stulti autem & amentis esse putauit, rerum etiam minimarum Deum causam esse confiteri; rei autem omnium maximæ, qualis est iustitia & sanctitas, in quibus est vita beata, regni quæ rectè ac laudabiliter administrandi ratio, causam ingenio, atque viribus humanis assignare. Itaque Salomon, à multorum hominum opinione, & sententia, longè hac in parte sibi recedendum esse existimauit. Multi enim sunt, atque, vtinam non plurimi inter Christianos essent, qui abundantia rerum, & multitudine equorum & quadrigarum, putant se ad fastigium ipsius felicitatis euolasse. At Salomon nō immemor doctrinæ patris, sæpiùs animum ad diuina illa consilia reuocabat: *Non saluatur Rex per multam virtutem, & Gigas non saluabitur in multitudine virtutis suæ. Fallax equus ad salutem, in abundantia autem virtutis suæ non saluabitur.* Itaque non in opibus, non diuitiis, non robore corporis, non florenti ætate, non magno firmoque exercitu; sed

folius.

folius Dei clementia, & benignitate, mentem cogitationemque suam sustentabat. Probè enim illud nouerat: *Ecce oculi Domini super metuentes eum, & in eis qui sperant super misericordia eius, ut eruat a morte animas eorum, & alat eos in fame.* Anima nostra sustinet Dominum, quoniam adiutor & protector noster est. Quòd si diligentius in istam diuinā spem, à Salomone in folius benignitate Dei repositam, inspiciamus, intelligemus Salomonem; non solum maxima spe clementiæ Dei suum erexisse animum, verumetiam sapientissimè erexisse. Primum enim in hac sua ad Deum, maxima cum humilitate & timore effusa precatatione, nihil omittit, quod ad vitandū malum, & summum obtinendum bonum pertineat. Bonum enim est finis. Cognitio autem boni est conditio, sine qua nemo potest appetere bonū. Ignoti enim nulla cupido. Boni verò & mali cognitio est illud, quod & timorem malī, & desiderium boni, vehementer excitat. Cor docile autem, est materia præparata & apta, ad excipiendam formā & speciem boni. Quæ omnia in hac breui Salomonis precatatione cernere licet: *Dabis ergo seruo tuo cor docile, ut populum tuum iudicare possit, & discernere inter bonum & malum.* Deinde non solum ea omnia, quæ ad consequendum finem plurimū conferunt, implorat & exposcit; verumetiam id facit

Psal. 32.

singulari ordine & modo. Ante omnia enim, cor docile sibi donari postulat : *Dabis ergo seruo tuo cor docile.* Cur ita ? Quia vt forma cuiusque rei, dispositam materiam, ita summi boni cognitio, quæ est gratiæ diuinæ principium, cor docile requirit. Frustra enim de cognitione summi boni cogitatio suscipitur, si cor docile ante non habeatur : quemadmodum si imber copiosus in terram subactam decadat, recipitur, ex saxo & petra defluit ; sic cor durum & saxeum diuinæ cognitionis & gratiæ, capax esse nõ potest. Quid enim efficacius fuit ad permouendum animum stupendis Moyfis miraculis & admirandis prodigiis ? nihil tamen illa obduratum cor Pharaonis permouerunt. Adeò durus obstinatusque fuit Pharaon, vt grauissimas pœnas nõ sentiret. Aquas in sanguinem conuersas videt Pharaon ; plagam Dei non timet : primos natu suorum filios, diuinitus occidi animaduertit ; non condolet : variis & mortiferis vrgetur morbis ; non sentit : cimicibus & foetidissimis ranis, & urbem, & palatium suum oppleri videt ; non perhorrescit : nouis subinde vulneratur plagis ; non corrigitur : ad extremum maris rubri vndas, & ad populum Dei defendendum, & ad se opprimendum, instar muri ex vtraque parte erectas & in sublimè elatas videt ; & tamen amens furensq; in medium periculum se coniicit, & ita vndis cum

vniuerso exercitu demersus obrutusque, pœnas gra-
 uissimas furoris & amentia percoluit. Tot tantaque
 mala cor durum & saxeum Pharaoni procreauit. Merito
 itaque Salomon, ante omnia cor docile sibi donari
 postulat, & maximopere postulat. Atque in hoc quidem
 incenso inflammatoque ad sapientiam Salomonis
 studio, cum alia plurimae virtutes, tum inter omnes
 eminet, in omni dignitate, humilitas & timor Do-
 mini. Cur enim Salomon, cor docile sibi donari po-
 stulat? cur id, quo abundare videtur in se, deside-
 rat? Si enim ideo cor Pharaonis durum & saxeum:
 quia Dei monitis repugnat, & grauissimas plagas
 non sentit; profecto Salomonis docile, quod se diui-
 nis praeceptis accommodat, quodque se in omnibus
 praeponentis Dei subiicit voluntati. Verum ita se-
 res habet: ut quo quis sapientior fuerit, hoc maiori
 sapientiae desiderio incendatur. Ita enim sapientia
 de seipsa loquitur: *Qui edunt me, adhuc esurient:* Eccl. 2. 4.
Et qui bibunt me, adhuc sitient. Quo autem quis ma-
 iori alicuius rei desiderio flagrat; hoc & plura in se
 requirit, & maiori metu, ne aliquid sibi in eius ade-
 ptione obstaret, cruciatur. Non est igitur mirum
 sapientem Salomonem, à praeponenti Deo cor doci-
 le ardentem postulare. Ut autem ex duro lapideoque
 corde, tot tantaque mala in Pharaonem redunda-
 runt; ita ex corde docili Salomonis, multa eaque
 præ-

præclarissima bona effluxerunt. Nam à Dei gratia & benignitate, Pharaon fuit reiectus, Salomon receptus : ille notitiam Dei amisit; hic maximam acquisiuit : illum mare suffocauit ; hunc immensus diuini amoris æstus absorbuit. Tantam enim latitudinem, vt sacræ literæ loquuntur, cordis, Salomoni clementissimus dederat Deus; quasi arenam, quæ est in litore maris. O magnam & admirandam vim, humilitatis & timoris Domini : quæ cùm animum hominis deprimendo, suis quasi viribus expoliat, tum diuinis armat : cùm proprio ornatu denudat, cælesti ornat : cùm in terram sternit, in cælum erigit : cùm sibi ingratum, abiectum, vilem, contemptum, despectumque efficit, tum Deo ornatum, diuitem, splendidum, ac in omnibus reddit gratissimum ! Egredere igitur, SIGISMUNDE REX optime, & vide Salomonem in diademate suo, in quo illum coronauit mater sua. Timor enim Domini, est corona sapientiæ, adeoque splendens corona ; vt non solum filias Sion, in sui conuerterit admirationem, sed & Deum ipsum è cælo ad videndum Salomonem, maximisq; bonis ornandum illustrandumq; deuocauerit.

Hæc de timore Salomonis eiusq; magnitudine : quæ, si copiosius explicata sunt, nemini mirum videri debet. Quod enim ad veram felicitatem & vitam beatam maximopere conducit, leui brachio transigendum

dum non est. Atque & illud, ea explicatione consecuti sumus, ut ea, quæ de diuino Salomonis amore, ardentique in Deum charitate fusiùs dicenda erant, paucis expediamus: quandoquidem iis rebus omnibus, quæ timori Dei tribuuntur, diuini amoris ratio contineatur. Nam mandata Dei exequi, in omnibus ex voluntate eius pendere, ad nutum se diuinum accommodare, in regnando summam æquitatem colere, honoribus non extolli, caduca ista & fluxa bona, præ illius gloria contemnere; nihil ad sua commoda, omnia ad Dei gloriam, & regni utilitatem referre, incensi amoris & ardentis in Deum pietatis indicium est. Quæ omnia, cùm in diuino timore inesse cognouerimus; satis liquet, explicato utrunq; Dei timore, ipsos quoque amoris Dei fontes, in pectore Salomonis clausos, apertos & patefactos esse. Ex quo sequitur, eum qui timet Deum, Deum amare; & qui vehementer timet, vehementer amare. Ita arctis vinculis, utrunq; gratia Dei copulauit. quanquam viceuersa non semper sequatur; illum qui amat Deum, necessariò Deum timere. Cùm nec in sanctissimam Trinitatem, in qua diuinus infinitusq; amor est, nec in regni cælestis incolas, qui maxima charitate flagrant, cum Christo vitam viuunt sempiternā, nequaquam alicuius rei timor cadere possit. In quo amoris & timoris Dei discrimen cernitur.

tur. Illud tamen certissimum est, in hac mortali vita, tantis vndeque cincta malis & periculis, sine timore Dei, vllum diuini amoris gradum, à nullo mortaliū conseruari posse. Spes enim, cū sit expectatio boni, cū earum desperatione rerum, quæ eam de conatu suo depellunt acerrimè confligit: & quò in maioris boni desiderio reponitur; eò aduersantia mala vehementiùs pertimescit. Quòd si sapiens Salomon, maxima Dei gratia cumulatus, & singulari Dei beneficio, quasi in penetralia amicitia Dei receptus, nihil de pristino timore Dei remisisset; sed quantò maioribus Dei muneribus affectus fuerat; tantò Dauidis patris sui consilium secutus, maiori timore carnes suas confixisset, tantòque in profundiorè humilitatè animum suū depressoisset; nunquam profectò eum, nec mulierum venustas excœcasset, nec regni amplitudo de summa felicitate deturbasset. Hæc tu, SIGISMUNDE REX, diligentius tecum ipse reputans, ita tacitus apud te ratiocinare, atque ita tuum animum ad magnum sanctissimi numinis metum excita: Si Salomon Rex sapientissimus, quod timorem Dei custodem cælestis gratia & virtutum omnium à se remouisset, fœde turpiterque lapsus, grauissimæ idololatriæ scelere nomen suum contaminauit; quantò timore Domini & metu, omnes cupiditatum noxij motus mihi debilitandi

tandi sunt atque frangendi ? Atque & illa meditatione animum tuum studiosè exerce: *Quantò magnus* Eccel. 3.
es humilia te in omnibus, & coram Deo inuenies gratiam, quoniam magna potentia Dei solius, & ab humilibus honoratur. In illo etiam, ad quod Salomon afflatus spiritu Dei omnes mortales cohortatur, tu tibi mente & cogitatione semper manendum esse existimato: *Deum time, & mandata eius serua. Hoc est* Eccel. 12.
enim omnis homo. Denique à tui generis claritate, à regię dignitatis celsitudine, ad breuissimi istius temporis momentum, quo tibi hinc commigrandū est, & ante illud tremendū tribunal seuerissimi iudiciis consistendū, accuratā considerationem sæpius animum reuoca, illa precatione Daudidis Regis & Prophetæ, clementiam Dei humillimè appellans: *Con-* Psal. 118.
fige timore tuo carnes meas, à iudiciis enim tuis timui. Nam etsi, quod optamus, & à clementissimo Deo summis precibus flagitamus, ad Nestoris vel Mathusalem annos vitam produxeris; hoc tamen totum tempus, quantumvis longū appareat; si tamen cum æternitate conferatur, vix exigui temporis nomen obtinebit. Hæc via, SIGISMUNDE REX optime, est tutissima, & ad maiore Dei gratiā consequendā, & ad eas opes retinendas, quas tibi à clementissimo Deo, & patre Domini nostri Iesu Christi, copiosè & liberaliter concessas, gratulamur, & nobis gaude-

Sap. 2.

mus. Quòd si aliquando Epicurus (qui à tua nobilissima aula absit longissimè) vel aliquis de illius grege porcus , te à tam salutari disciplina , ad laxatam curis æternæ vitæ , ducentemque ad interitum viam traducere conabitur , tibi que persuadebit , vt te cum vana futili que hominum turba , quam sapientissimus Salomon , in suæ sapientiæ libris , tanquam impiam detestatur , rosas antequam marcescant coronas , te totum iocis & lusibus tradas , te in voluptatum cœno immergas : tu protinus pro tua insigni pietate , REX serenissime , vultu , fronte omni que ratione & modo , ostendito indigna hæc esse tua regia dignitate & præstantia : sit que illud tibi semper ratum & fixum , non esse Christiani & sapientis Principis , in quo natura ipsa , omnibus normam viuendi posuit : natura enim ita comparatum est , vt regis ad exemplum totus componatur orbis , leuissimo vento à virtute ad vitium , à luce ad tenebras , à laude ad ignominiam , & à salute ad perniciem rapi. Sed ad Salomonis diuinum amorem , illius que magnitudinem redeamus. Habet autem hoc peculiare verus & syncerus amor ; vt nulla re ab eo , quod sibi colendum proposuit , diuelli possit : in illo vno hæreat : vnum illud cogitet : illius semper desiderio ardeat : illud vnum in deliciis habeat : illius amicitiam semper expetat : illius gratia , omnia alia contemnat ,

nat : in illius solius cultu omne suum studium , curas, & cogitationes deponat. Verùm , cuius dicendi facultas summi amoris vim ita commodè explicabit; vt in iis paucis verbis, quæ Salomonis summa in Deum pietas & amor ex intimo pectore effudit , perspicitur : *Pone me vt signaculum super cor tuum, vt signaculum super brachium tuum : quia fortis est, vt mors dilectio : dum sicut infernus æmulatio : lampades eius, lampades ignis atque flumarum. Aquæ multæ non potuerunt extinguere charitatem , nec flumina ob-ruent illam. Si dederit homo omnem substantiam domus suæ pro dilectione , quasi nihil despiciet eam. Quibus si illa alia summi amoris indicia addideris , quæ Salomon in amoribus sponsi & sponsæ mirificè expressit ; an non tibi huius sapientissimi Regis amor diuinus & pietas, ad Moylis zelum, Eliæ feruorem, aliorumque sanctissimorum patrum extases, ad ipsumque cælestis charitatis fastigium peruenire videtur ? Neque verò existimandum est, Salomonem in Canticis Canticorum, Christi tantum sponsi & sponsæ Ecclesiæ, mutuum descripsisse amorem, illiusque magnitudinem. In Ecclesia enim, quam nomine charissimæ sponsæ intelligit, seipsum comprehendit ; & quod numine cælesti afflatus, tanquam propheta prænunciauit ; hoc in se ipso, maxima Dei clementia, abundè expertus erat. Est enim Deus*

Cant. 8.

ignis consumens, qui quamprimū in alicuius pectus
faces suę diuinitatis intulerit, continuò totum illius
domiciliū & sapientię splendore illustrat, & flāmis
diuini amoris incendit. Scio Balaam antè aduentū,
& Caiphā post aduentum Mesię prophetasse; v-
trunque impium, vtrunque à charitate Dei remotis-
simum. Sed & illud non obscurum est, vtrunque di-
uina oracula ita frigide ore suo effudisse, vt per illo-
rum saxeæ corda, scelere & auaritia obfirmata, ve-
luti aqua limpidißima per durum saxum, numinis
diuini afflatus decurrisse videatur: *Oportet*, inquit
impius Caiphās, *unum hominem mori, ne tota gens
pereat*. O saxeum cor! Si enim tanta charitas istius
vnus hominis est; vt seipsum morti pro toto genere
humano obiecerit; cur impiissime Caipha tam ar-
dens flamma charitatis, tuum frigidum pectus non
exurit? cur tantus ignis auaritię humorem non
exsiccat? cur hoc, *oportet unum hominem mori*, ita
pronuncias, ac si immensa hæc Dei bonitas nihil ad
te pertineat? Non ita Salomon de Christi charitate
vaticinatur: non in feruentissimo amore Dei fri-
get; sed cum prophetico spiritu, in cælum animo
sublatus, amorem Iesu Christi sponsi in Ecclesiam
intuetur, tanquam mollissima cera ad calorē ignis;
sic ille ad immensam Iesu Christi charitatem, quasi
liquefactus & dilapsus diffunditur, dulcissimo illo &
cæle-

cælesti vino in sponsi Iesu Christi horto, cum Patriarchis, Prophetis, Apostolis, Martyribus, aliisque sanctissimis viris ebrius, noctu sponsum quærit, vigiles ciuitatis excitat, denique ardenti illo amore, quem in Canticis Canticorum, tot tamque variis & appositis similitudinibus describit, & multo artificiosius, quam laudatus Apelles pingendo potuisset, ob oculos ponit, se pectus sauciasse suum ostendit clarissimè. Verùm, ne aliquis hanc insignem charitatem Salomonis in dubium vocare possit, non obscurum extat in diuinis literis ea de re testimonium. Sic enim in libro Regum legimus: *De-*
dit quoque Deus Salomoni sapientiam & prudentiam ^{3. Reg. 4}
multam nimis, & latitudinem cordis, quasi arenam
quæ est in littore maris. In quibus verbis, ut sapientia & prudentia diuersa sunt; ita latitudo cordis diuersum quippiam ab utroque esse significatur. Cùm autem cor sit sedes amoris & affectuum domiciliũ; sequitur latitudine cordis, immensum Dei amorem Salomoni donatum fuisse. Ac ne subtilioribus argumentis interpretationem verbi quæramus, quid latitudo cordis significet, Dauid Propheta clarè nobis explicauit: *Viam, inquit, mandatorum tuorum cucurri, cùm dilatasti cor meum.* Itaque apud Dauidem dilatatio cordis causa est, ut non solum mandata Dei exequamur, sed etiam in iis exequendis curra-

curramus: quod quidem est indicium amoris singularis. Cæterùm, cùm sine maxima charitate, nullus ad insigne studium, exequendi mandata Dei concitetur; cōsequens profectò est, dilatatione cordis, quæ causa est sanctè & religiosè obseruandæ legis diuinæ, maximum in Deum amorem comprehendendi. Iam verò, quæ maior latitudo cordis ea esse potest, quæ est similis latitudini arenæ, quæ est in maris litore? Itaque, cùm ea similitudo immensæ charitatis insignes nōtas habeat, facilè intelligitur reliquas similitudines, è quibus immensa quædam charitas eminet, in illud studium & ardorem amoris, quo Salomon in Deum erat affectus, conuenire. Constat igitur, eius amoris, quem Salomon erga Deum habebat, magnitudinem & vim admirabilem fuisse. Quanquam autem tanta vis amoris, donum potius, quàm alicuius rei causa videatur: clarum enim est, vnà cū illa sapientia, admirabili & inusitata hanc immensam cordis latitudinē Salomoni, non ante, sed post humilem precationem donatā fuisse; certum tamen est Salomonem, cùm illud sapientiæ & amoris diuini donum à Deo postulasset, vt initium sapientiæ, qui est timor Domini; sic tantæ charitatis præclara principia & fundamenta habuisse. Non enim timor seruilis (vt vocant) qui est à charitate alienus, in diuina gratia, quam Salomon à Deo maxi-

maximam iniierat, homines reponit. Sed ut se res habet, constat charitatem hanc & summam sapientiam Salomonis, ingentis illius felicitatis, cuius erat admiratione Regina Saba obstupefacta, causam fuisse. Quam rem multa confirmant: inter quæ calamitosus & formidandus Salomonis casus, maximum & clarissimum est argumentum. Nam ut primum ad cæca & insana mulierum lenocinia, Salomon diuinum amorem & timorem exuerat, è vestigio ex summa felicitate decidit. Adde, quod ipse præpotens Deus disertis verbis significet, insanum & obscenum muliebrem amorem, propter quem Salomon legem Dei violârat, illius felicitatis ruinam edidisse. Apponam hoc loco ipsa sacrarum literarum verba, quæ apertè in charitate fontem gratiæ diuinæ constituunt: *Tu quoque*, verba sunt præpotentis Dei ad ^{2. Par. 7.} Salomonem, *si ambulaueris cum me, sicut ambulauit Dauid pater tuus, et feceris iuxta omnia quæ præcepi tibi, & iustitias meas iudiciaq; seruaueris, suscitabo thronum regni tui, sicut pollicitus sum Dauid patri tuo, dicens: Non auferetur de stirpe tua uir, qui non sit princeps in Israël. Si autem auersi fueritis, & dereliqueritis iustitias meas, & præcepta mea, quæ proposui vobis, et abeuntes seruiueritis diis alienis, & adonueritis eos, euellam vos de terra mea, quam dedi vobis, & domum hanc, quam sanctificaui nomini meo,*

proiciam à facie mea, & tradam eam in pambolam, & in exemplum cunctis populis. Et domus ista erit in proverbium vniuersis tranſcuntibus, & dicent ſtupentes: Quare fecit Dominus ſic terræ huic, & domui huic? Reſponderuntq̃, quia dereliquerunt Dominum Deum patrum ſuorum, qui eduxit eos de terrâ Ægypti, & apprehenderunt deos alienos, & adonauerunt eos & coluerunt: idcirco venerunt ſuper eos vniuerſa hæc mala. Hæc diuinæ literæ, ex quibus luce clariùs patet, amorem Dei & pietatem, tantæ felicitatis Salomoni cauſâ fuiſſe. Vnum eſt in quo aliquis admiratione ſuſpenſus, hæſere poſſet. Non enim paruum res ea inducere videtur difficultatem: nempe quomodo charitas, quæ donū eſt Dei, inter ea, quæ propria ſunt homini, numeretur. Ob charitatem, Salomoni promittitur regni felicitas. At ea inſignis charitas, donum Dei fuit, totaſq̃ue gratiâ Dei nitebatur. Itaq̃; ſi donum Dei eſt, cur Salomoni, vt res quædam propria aſſignatur? Si autē illi propria eſt; cur donum Dei appellatur? Verū ea eſt præpotentis Dei in homines liberalitas & clementia; vt ille ipſe, qui nobis ob Ieſu Chriſti effuſum ſanguinem gloriam immortalem donauit; is etiam gratiam, qua ad eam gloriam & immortalitatem vehimur, largè effuſeque donârit: vt gratiam pro gratia haberemus. Quod cū non ignoraret Salomon mu-

renulas aureas sponsæ à sponso factas fuisse, hoc est, omnia ea bona, quibus homines in amicitiam Dei recipiuntur, Iesum Christum sponsum animæ fidei contulisse commemorat. Atque hoc inter alia est, quod in Salomone, & magnam humilitatem, & charitatē, & pietatē in Deum excitabat. Videbat enim Salomon, nullum virtutis diuinæ opus, solius naturæ viribus gigni & contineri: videbat è contra, ea omnia, quæ gratiam Dei sua vi & dignitate ad se allicerent, ab ipsius liberalitate Dei proficisci. illud Salomonem in contemptionem & despicientiam sui deprimebat; hoc ad diuinum amorem excitabat. At, quem amorem? summum & admirabilem. Intuere, REX serenissime, quanto amore hic sapientissimus Rex, in Canticis Canticorum, prophetico spiritu afflatus, in sponsum Iesum Christum feratur? quomodo non interdiu tantum, vbi pascat, vbi cubet in meridie, sed & noctu in suo lectulo eum quærat? quærat autem, ne vagari incipiat post greges sodalium: quomodo ciuitatē, illam, inquam, ciuitatem Dei, supra montem positam Ierusalem circum-
 eat: per vicos & plateas currat, & inuentis vigilibus & custodibus ciuitatis, ex illis de sponso Iesu Christo percontetur? quanta voluptate se introductum in cellaria Regis sponsi gestiat? quanto gaudio à Sole
 iustitiæ Christo se esse coloratum exultet? quan-

Can. 1.

Can. 4.

Can. 4.

Can. 4.

ta lætitia memor huberum sponsi super vinum incendatur ? quomodo fasciculus myrrhæ dilecti sui inter hubera illius commoretur ? hoc est, quantum ardentissimæ charitatis vulnus Christi sponsi sanguine, ex huberibus illius pro salute hominû effusi, dulcedinem vini longè multumque superantis, in pectore suo alat, & quam incenso diuini amoris carpatur igni. Non percurro singula, ad aliqua tantum Salomonis incensi amoris in Deum indicia, admirandis similitudinibus in Canticis Canticorû adumbrata, digitum intendo. Tu pro tua, REX serenissime, singulari pietate, ea diligenter apud te expende ; & à sponso Iesu Christo inuitatus, ingredi in hortum illius cum Salomone, aliisque viris sanctissimis, ac vino illo dulcissimo, quod pro salute generis humani, ex suo latere haustum, tibi, omnibusque suis charissimis propinat, inebriare ; vt mero illo suauissimo sopitus animum curis huius seculi languidum, quieti diuinæ tradas, domus patris tui, vt Regius Propheta admonet, obliuiscaris : aurem tuam ad præcepta & consilia diuina inclines ; eaque ratione efficias, vt Rex Iesus Christus sponsum, tantum decus & speciem tuam concupiscat. Multæ, vt in regia Salomonis, ita & in tua, REX optime, tanto honori, tantisque cælestibus bonis, struuntur insidiæ : multæ parantur fraudes : multi latent hostes.

Hic

Hic igitur animo opus est, hic pectore firmo. Itaque
 vt quondam *lectulum Salomonis*; ita nunc tuum, Cant. 3.
 REX serenissime, *sexaginta fortes ambient ex fortis-*
simis Ismaél: omnes tenentes gladios, & ad bella do-
ctissimi: uniuscuiusque ensis super femur suum, pro-
pter timores nocturnos. Ita hostium latentes insidi-
 as opprimes; eorumque conatus, motusque, omnes
 in tuæ istius tam diuinæ felicitatis perniciem para-
 tos, prohibebis.

Reliquum est, vt de Salomonis studio, quo in au-
 gendo illustrandoque cultu diuino affluebat, bre-
 uiter dicamus. Potest autem facilè intelligi, quàm
 ardens studium ad propagandam Dei gloriam, ex
 tanto Salomonis & timore & amore diuino extite-
 rit. Vt enim ij, quos spiritus malignus proculà pieta-
 te Christiana abripuit, omnia, quæ Christi Domini
 gloriam extollunt, populantur, vastant, euertunt;
 sic quantò alicuius feruentior amor in Deum fuerit,
 tantò maiori studio, ad amplificandam Christi glo-
 riam, incitatur. Tria autem sunt potissimùm, in hoc
 Salomonis diuino & externo cultu (de hoc enim
 nunc agemus) ad quæ ceu quædam capita reliqua
 facilè reuocari possunt: templi ædificium, victimæ,
 sacerdotum ordo & dignitas. In quibus omnibus
 admirabilis quædam pietas Salomonis lucet splen-
 detque. Ac primùm ad ædificium templi animum

conuertamus. Cùm autem in omni magnifico ædificio, duo illa imprimis intuentium oculos admiratione tenere soleant, materia & forma ædificij; hæc eadem nos spectabimus in templo Salomonis; nempe quàm præclara sit illius materia, & quàm pretiosa; tum quæ illius sit forma & figura, quàm ampla, & quo artificio, & quàm affabrè tam illustri materiæ coaptata. Ingrediamur igitur templū illud amplissimum Salomonis, & ipsū spiritum sanctum, in libris Regū & Paralipomenon, quasi nōs manu ducentem, & immensas illas opes, aurum, argentum, lapides, gemmas pretiosas, digito nobis monstrantem, intueamur. In libris Paralip. tale numinis diuini legimus testimonium, de materia & ornamentis domus Domini: *Deaurauit eam intrinsecus auro mundissimo: domum quoque maiorem textit tabulis lignicis abiegnis, & laminas aureas obrizi affixit per totum. Struxit quoque pauimentum templi pretiosissimo marmore decore multo. Porro aurum erat probatissimum, de cuius laminis textit domum, & trabes eius, & postes, & parietes, & ostia, & cælauit Cherubim in parietibus. & paulò post: Sed & clauos fecit aureos, ita ut singuli clauis siclos quinquagenos appenderent. Cœnacula quoque textit auro.* Longum esset singula numerando percensere, altare aureum, Cherubim maximos auro tectos, candelabra cum lucernis suis,

florenc.

florentia lilia, forcipes, thymiateria, thuribula, phialas, mortariola, omnia de auro purissimo fabrefacta. Verum auri & argenti, quo templum Salomonis abundabat copiam, ex his verbis Davidis Regis æstimari licet: Ego, inquit, totis viribus meis præparavi impensas domus Dei mei. *Aurum, ad vasa aurea: & argentum, ad argentea: æs, in ænea: ferrum, in ferrea: ligna, ad lignea: & lapides Onychinos, & quasi stibinos, & diversorum colorum, omnemq; pretiosum lapidem, & marmor Parium abundantissimè, & super hæc quæ obtuli in domum Dei mei de peculio meo, aurum, & argentum, do in templum Dei mei, exceptis his, quæ præparavi in ædem sanctam, tria millia talenta auri de auro Ophir, & septem millia talentorum argenti probatissimi, ad deaurandos parietes templi, & ubicunque opus est aurum de auro, & ubicunque opus est argentum de argento, operi fiant per manus artificum.* Sed non satis erat sanctissimo Davidi Regi, sua in ornamentum templi elargiri, nisi etiam ad simile factum alios principes viros excitasset. Audi obsecro religiosum Davidem inuitantem satrapas suos: *Et si quis, inquit, sponte offerat, impleat manum suam hodie & offerat, quod voluerit Domino. Polliciti itaq; sunt Principes familiarum & proceres tribuum Isniel; Tribuni quoque, & Centuriones, & Principes, principum possessionum Regis e*
dede.

constet ex diuinis literis, & ad præstantissimum finem, & à præstantissimo artifice excogitatâ & designatâ fuisse. Non enim eam Policletus, & Phidias statuarij excellentes: non Apelles & Zeuxis pictores præstantes: non denique ipse Dædalus in excogitandis labyrinthis celeberrimus; sed ipsemet præpotens Deus, omnium sapientissimus architectus effinxit, & Dauidi Regi designauit. Id ipsius Dauidis verba declarant: *Omnia*, inquit, *venerunt scripta manu Domini ad me, vt intelligerem vniuersa opera exemplaris.* Atque hanc quidem præstantem formam, non exiguo alicui tecto angustoque tugurio, sed amplissimo augustissimoque; palatio coaptatam fuisse, apertè satis declarat Salomon: *Opus*, inquit, *grande est; neque enim homini præparatur habitatio, sed Deo.* & in libro Paralip. *Domus enim quam ædificare cupio, magna est: magnus enim est Deus noster, super omnes deos. Quis ergo poterit præualere, vt ædificet ei dignam domum.* & paulò post: *Domus enim quam ædificare cupio, magna est nimis & incluta.* Iam verò amplissimam templi formam spectantibus multis in locis sese nobis offert pietas Salomonis. Primùm quia à præscripto præstantissimi architecti exemplari, ne transuersum quidem vnguem sibi discedendum esse putauit; sed totam illam formam templi, ab ipso Deo summo architecto factam, in-

2. Par: 3.

tentos oculos, acremque animum in illius speciem defigens, ad eamque manum artificis dirigens, maximo conatu in sui templi ædificium deduxit. Deinde, quia & præstantissimos & plurimos artifices, ad illud extruendum & illustrandum templum vndique conquisiuit. Eorum numerus & multitudo ex eo cognoscitur: *Fecit ex eis septuaginta millia, qui humeris onera portarēt, & octoginta millia, qui lapides de montibus cedrent; tria autem millia & sexcentos præpositos operum populi.* Quoniam verò artifex ab ignis non distinguitur, si artē subtraxeris; eamobrem artificum Salomonis præstantiā, opus & artificium illustrabit. Et in arte quidem sculpendi & pingendi, quæ ut reliquæ disciplinæ & artes in naturæ imitatione consistit, illud primum & maximum est: in mutum simulachrum res ad viuum imprimere. In eo genere excelluerunt duo pictores celeberrimi, Parasius & Zeuxis: hic, ut refert Plinius, vuas pictas tanta dexteritate & artificio in theatrum detulit, ut in scenam aues aduolarent: quas deinde Parasius linteo picto, ita veritatem exprimente texerat; ut ipse Zeuxis ad vuas suas in scenam reuersus, flagitaret remoto linteo picturam ostendi. Ergo & pictores & statuarios non paucos habuit Salomon, qui artis præstantia, Zeuxim & Parasium, aut superarunt, aut certè adæquarunt: propterea quòd.

quodd tanto artificio templum illud amplissimum, undique imaginibus exornârint; vt non tam imagines, quàm res ipsas, quarum erant imagines, admirabili ingenio oculis hominum subiecerint. Expende illud quod de pictoribus, libris Regum, conscriptum est: *Sculpsit quoque in tabularis illis, quæ erant* 3.Reg.7.
ex ære, & in angulis Cherubim, & leones, & palmas, quasi in similitudinem hominis stantis; vt non cælatæ, sed apposita per circuitum viderentur. Quid illud? Non est opus tale in vniuersis regnis. Effectus certè 3.Reg.10
 causæ excellentiam in lucem profert, & ars artificis industriam. Quod cùm ita sit profectò concludendum est, in vniuersis regnis nunquam similēs artifices extitisse. Nihil inane literæ diuinæ continent: cùm illarum iota & minimus apex, Christi Domini testimonio, maximum habeat pondus. Tale autem de industria & artificio Hiram, libri Regum dant testimonium: *Misit quoque Rex Salomon, & tulit;* 3.Reg.7.
Hiram de Tyro, filium mulieris viduæ, de tribu Neptali, patre Tyrio, artificem ænarium, & plenum sapientia & intelligentia & doctrina, ad faciendum omne opus ex ære. Ergo cùm ex diuinis literis habeamus Hiram pictorem & sculptorem præstantissimū fuisse, plenum sapientia & intelligentia: plenum autem id dicatur cui nihil potest accedere; profectò sequitur necessariò, nec Parasij, nec Zeuxis, nec

Calcostenis, nec Niciæ, nec Paraxitellis, pictorum præstantissimorum; nec denique illius Demonis Atheniensis, qui duobus illis à se pictis Hippolitidibus, quorum alter in certamine ita decurrit, ut sudare videatur, alter arma deponit ut anhelare sentiat, excellentium pictorum artem obscuravit, industria admirabili, ex nobilissimi artificis Hiræ sapientia aliquid aut decerpi, aut addi posse, ad illius perfectionem & diuinam pingendi sculpendique artem. In his igitur omnibus præstantiam templi Salomonis non malè cernere licet. Nam ut res ex causis; ita ex causarum dignitate rerum excellentia exoritur: atque ideo quo causæ rei sunt excellentiores; eò causarum effectus præstantiores esse necesse est. Quid igitur hoc templo augustius fingi aut cogitari potest: quod ad eum finem ædificatum erat, ut ipse Deus in eo sedem suam poneret; & quemadmodum in cælo à sanctorum & angelorum choro; ita in terra ab hominibus coleretur? Deinde in quo aurum, argentum, lapides pretiosi, materiæ locum tenuerunt? Ad extremum, quod admirabili forma & prorsus diuina, nempe à Deo ipso designata, tot eximij artifices illuminarunt & exornarunt; adeò ad exemplar illud cælitus demissum accommodatè, ut cælestis templi & palatii amplitudinem, ipsius diuinitatis splendore illustratam, ciuium sanctorum dignitate

& ho-

& honore amplificatam, & innumeris stellis & sideribus lucentem referre videretur. O Salomonis pietatem singularem! Quam procul ab ea pietate Salomonis, nostrorum hominum studia distant? quid dico distant? imò verò quàm acri & immani bello cum ea Salomonis pietate disceptant? Salomon enim domum Domini, auro & argento exornat: isti contra, auro argentoque domum Dei expoliant. Salomon domum Domini egregiis picturis, statuis, & imaginibus locupletat: isti è contra, hæc omnia in domo Domini demoliuntur, confringunt, comminuunt. Salomon domum Domini prægrandem, amplam, & inclytam ædificat: isti contra, amplam & inclytam domum Domini conuertunt in tugurium desertum, expilatum, prophanatum. Sed hæc in hæreticis sunt tolerabiliora. Si enim ipsius præpotentis Dei, sanctissimum numen violarunt; minus videri debet, cum sedem illius conuellunt, & excindunt. In catholicis autem hominibus, vt leuissimo verbo dicā ea socordia & segnities vehementer deploranda, & execranda videtur: qui doctrina S. Ecclesiæ Romanæ & Apostolicæ imbuti cum certò apud se statuant, Deum ipsum præpotentem, arcamque illam cælestē, non manna, sed verum Iesu Christi corpus & sanguinem continentem, in templo Catholico habitare; eos tamen de tuenda dignitate

& decore domus Dñi minima cura attingit. Quid facis ô homo Christiane? Dei domum hanc esse certò tibi persuades: in illo etiã non hæres, omne decus & ornamentum deberi domui Domini: cur igitur non vt domũ Dei tui, tibi excolendã esse arbitraris? Quæ (malum) est ista amentia? Existimare inclytam & amplissimam domum glorioso Deo deberi; & tamen vile tugurium illi assignare? Daudidis & Salomonis præstantissimorum Regum pietatem in exornando & locupletando templo probare, & in cælum attollere; & tamen ad simile factum minimè permoueri. Sed hoc fortasse minus tibi videbitur. Sin autem eo peruenisti, vt impietati & hæretico furori, patrimonium Iesu Christi dissipare, & deuorare cupienti, studio & autoritate non obstitas: remissè hîc & moderatè agas, aut quod selectius est, aurum, argentum, & reliqua bona, à maioribus tuis, sanctè & religiosè diuino cultui dicata, templo Dei detrahare coneris; hoc verò quid aliud est, quàm Dionysij tyranni in expilandis templis impietatem imitari? Qui, quum, vt Cicero refert, ad Peloponnesum classem appulisset, & in fanum venisset Iouis Olympij, aureum illi detraxit amiculum grandi pondere, quo Iouem ornatat, ex manubiis Carthagenensium tyrannus Gelo. atque in eo etiam cauillatus est, æstate grauem esse aureum amiculũ, hyeme

hyeme frigidum, eiq; laneum pallium iniecit: quum id esse aptū ad omne anni tempus diceret. Idēq; Æsculapij Epidauri barbam auream demi iussit. neque enim conuenire barbatum esse filium, quum in omnibus fanis pater imberbis esset. Facetè satis Dionysius, in Deos suos est debachatus. Atq; hoc quidē illi ex ea parte condonandū esse videtur: quod cū sciret Iouem & Æsculapiū stipitem & truncum fuisse, nullum facinus se in diuinum numen admisisse existimārit. Tu verò Christiane homo, an Dionysij lepōre & facetiis captus, in Christianę religionis ruina ita tibi facetus & falsus videri voles? an patrimoniū Iesu Christi, vt Iouis Olympij aureum amiculū esse reputabis: & pro aureis vestibus, laneum palliū Iesu Christo iniicies? an vt in auream barbam Æsculapij, sic in ornāmēta & opes Iesu Christi sponsę Ecclesię inuolabis? & non solū salibus Dionysij, ad ignominiā Religionis Christianę abuteris; sed etiā ipsius Iesu Christi potentiā, & authoritati, cum Iudæorum carnificibus sceleratis, qui authorem vitę, suis vestibus expoliatum, immanissimè flagris ceciderunt, illudes? Quid igitur tibi reliquum in summa ista insolentia extremę impietatis fecisti; nisi vt cum illa scelerata Iudæorum turba Pilato, an Regem Iudæorum cruci affixurus esset, percontanti, respondeas? *Non habemus Regem*, intellige Christum

Domi-

Dñm, *nisi Cæsarem* ? aut certè, si Christianus esse vis & id quod res est fateri: dignū te esse, nisi ad saniorē redeas mentē, iudicabis, quem iustissimus Deus acerrimus scelerum ultor, fulmine percutiat, & in orcum detrudat. Quæro enim ex te, qua fronte templū Dei tua opera lacerum, spoliatum, ruinosum, ingredi audebis & Deum iniuria, & recenti vulnere diuino illius honori inflicto laceffere & irritare? Explica atque excute intelligentiam tuam, & ad punctum temporis sobrij Christiani, cuius viua fides vitā & actiones moderatur, cogitationem suscipe. Ante omnia autem illud de diuina præstantia & natura, diligentissimè tecum expende; Deum omnia intuentem, in templo habitare, scelus & impietatem detestari: maximè verò eos, qui Gigantum more illi bellum inferunt, grauissimis mulctare pœnis. An non Bethsamesitas Arcæ fœderis vim inferentes, pestiferis & funestis morbis affecit? Ozam Ahio filium Arcam Domini tangentem trucidauit? impium & superbū Antiochum, qui templum Dei expiliârat misero diuturnoque morbo tabescentem interemit, & in Plutonis horridum carcerem præcipitauit? Atqui Oza ad arcam manum admouit, non vt eam expilaret; sed vt labentem sustentaret. O acerrimum sacrilegi sceleris ultorem Deum! Si enim ij, qui leuiter honorem Dei offendunt, grauissimas luunt pœnas; quæ

quæ supplicia sacrilegis & sceleratis hominibus constituta esse arbitraris? Quomodo igitur altaris Domini præda onustus, templum ingredi, & os tuum illi ostendere audebis? Qua ratione in animum inducere potes, te ab eo gratiam inire posse, quem certò scis, tantopere sacrilegis esse iratum? An eum existimas, beneuolentia complecti templa expilantes; qui de templo eiecit vendentes? Sed te iam poenis non terrebo. Nam generosus animus, magis clementia & benignitate flectitur. Quid igitur? an te maxima Dei clementia, quam Iesus Christus generis humani Seruator, in templo defixit, non commouebit: & in amplificandum illius diuini numinis cultum incitabit? Quid enim putas, in illo altari arca illa contineri? An tibi parum videretur, si virgam Aaronis, & manna illud cæleste, quæ duo ad magnam, non Obededom solùm, sed etiam totius Israël felicitatem, maxima Dei beneficia sæpiùs adiunxerunt, contineret? Atqui hîc maius quidam est & diuinius. Non enim arca illa manna cæleste; sed Iesu Christi corpus: non virga Aaronis, gerens crucis Christi figuram & typum; sed ipsemet filij Dei sanguis, pro vniuerso genere humano in ara crucis effusus, continetur. Hoc verò cuius tandem est benignitatis & clementiæ, cùm in hoc eodem templo à te expilato, idem Iesus Christus tibi suum corpus

porrigit, cùm tibi sanguinem suum propinat, & te tam admirabili cibo & potu, recreare cupit: deniq; vitam & immortalem felicitatem, si modò tibi ipsi deesse nolis, tibi donare, est paratus? O immensam Dei liberalitatem! ô inauditam Dei clementiam! Sed quod tam durum & ferreum pectus esse potest, quod tanta clementia Dei non emolliat? aut quis est adeò fero & agrestis animo, quem tanta bonitas Dei, non leniat? aut quæ tanta cupiditatis & auariciæ sitis, quam ita redundantia ac superfluentia diuinæ clementiæ flumina non extinguant? Nihil dicam amplius. Quid enim amplius dici potest? Si enim sanguis pretiosissimus, qui ex latere illius profluens, Solem obscurauit: cœcos illuminauit: velum templi scidit: petras dissecuit: sepulchra aperuit: mortuos ad vitam excitauit: animum durum & scelere & auaricia obfirmatum non commouebit; an aliquid in natura rerum reperietur, quod tam graui & inueterato malo medicinā afferre poterit?

Venio nunc ad victimas Salomonis, in quibus etiam non minorem pietatem Salomonis perspicimus. Duo autem oblationum genera vetus illa lex habebat: alterum ad ornatum templi spectans; victimarum alterum: in quo multæ sunt diuisiones. quarum cognitio, quoniam ad præsens institutum parum attinet, idèò ea tantùm hîc spectabimus, quæ

Salomo-

Salomonis pietatē mirificè commendabunt. Et de primis quidē oblationibus, paulò antè dixi, cū explicarem quantum auri & argenti ad ædificandū & exornandum templum Salomon attulisset : hæ autē aliæ quantę quamq; multæ fuerint, breuiter ex libris Paralipomenon commemorabo : *Mactauit igitur Rex Salomon hostias bouum viginti duo millia, & dedicauit domum Dei, Rex & vniuersus populus.* Et cap. 5. *Rex autem Salomon, & vniuersus cætus Israhel, & omnes, qui fuerant congregati ante arcam, immolabant arietes & boues, absq; vllō numero. Tanta erat multitudo victimarum.* Quod verò eius generis victimæ sæpius Deo offerrentur, ex his perspicuū est : *Tunc obtulit Salomon holocausta Domino super altare, quod extruxerat ante porticum, vt per singulos dies offerretur in eo, iuxta præceptum Moysis, in Sabbathis, & in Calendis, & in festis diebus.* Iam verò has victimas non vulgares fuisse, admiratio Reginæ Sabæ maximo est argumento. Hæc enim non solum in ædificiis templi & palatij, & id genus aliis rebus; verū etiam in ipsis victimis, sapientiam & pietatem Salomonis est vehementer admirata. Sed ea vis & multitudo victimarum, ex sacris literis clariùs apparebit : *Quæ postquam vidit sapientiam scilicet Salomonis, & domum quam ædificauerat, necnon & cibaria mensę eius, & habitacula seruorum, & officia mini-* 2. Par. 7.

O 2

strorum

strorum eius & vestimenta eorum, pincernas quoque & vestes eorum, & victimas quas immolabat in domo Domini, non erat præ stupere cultui in ea spiritus. Percurro singula. Sunt enim eiusmodi, vt contenta doceri, omnia ornamenta respuant. Quid enim maius? quid augustius? quid magnificentius his victimis esse potest: quæ in tantam admirationē Raginam Sabam rapuerunt; vt ei spiritum ademisse videretur? Age verò cum victimæ, quo promptiore & alacriore animo offeruntur; eo Deo Opt: Max: soleant esse gratiores; quis non intelligat ex ea significatione gratiæ singularis, à clementissimo Deo in Salomonem hostias immolantem profecta, tantā sapientissimi Regis charitatem, & concitatum, in eo genere pietatis ad Dei laudem illustrandam, studium pondus habuisse; vt in illa Critolai lance, quæ sua gravitate terram & maria deprimebat, positum esse videretur. Hæ igitur sunt victimæ Salomonis, ac earum multitudo & præstantia.

Restat Sacerdotij dignitas, quæ quo loco apud Salomonē fuerit, iis omnibus est notissimū, quibus pietas Regis sapientissimi, & ratio victimarum, nota atq; perspecta est. Ea enim omnia, quæ Israëliticus populus Domino offerebat, ad vsus vitæ necessarios, idem liberalissimus Deus Sacerdotibus, in libris Numerorum assignavit. Sed ea ipsa Dei Opt: Max: in
Sacer-

Sacerdotes munificentia, sacrarum literarum testimonio clariùs apparebit. Sic enim in libris Numerorum habetur: *Locutusq; est Dominus ad Aaron: Num. 18. Ecce dedi tibi custodiam primitiarum mearum. Omnia quæ sanctificantur à filiis Israhel, tradidi tibi & filiis tuis, pro officio Sacerdotali legitima sempiterna. Hæc ergo accipies, de his quæ sanctificantur, & oblata sunt Domino. Omnis oblatio, & sacrificium, & quicquid pro peccato atq; delicto redditur mihi, & cedit in sancta sanctorum, tuum erit & filiorum tuorum: In sanctuario commedes illud. & paulò post: Omnem medullam olei, & vini, ac frumenti, quicquid offerunt primitiarum Domino, tibi dedi. Vniuersa frugum initia, quæ gignit humus, & Domino deportantur, cedunt in usus tuos: qui mundus est in domo tua, vescetur eis. Omne quod ex voto reddiderint filij Israhel, tuum erit. Mitto reliqua, ex his enim satis liquet, nihil clementissimum Deum ex victimis & oblationibus prætermisisse, quod non liberalissimè in Sacerdotum vtilitatem conuerterit. In eo autem maxima quædam Sacerdotum dignitas elucet. Cùm enim in victimarum dono & munere, maximus insit honor: cultus enim patriæ hostiis & victimis continetur; sequitur profectò, cui donantur victimæ, eidem maximum & diuinum tribui concedique honorem. Atque hæc quidem consecutio diuinum quendam*

Heb. 7.

honorem, Sacerdotali dignitati adiungens, non ex mea officina, sed ex ipsius D. Pauli sapientia profecta est; qui in epistola ad Hebræos, ex eo quòd Abraham Melchisedecho Sacerdoti decimas dederit, tãquam firmissimo argumento, concludit, Melchisedechi maximam præstantiam & dignitatem. Audi obsecro ipsum D. Paulum, Melchisedechum Sacerdotem laudibus ornantem: *Hic enim Melchisedech Rex Salem Sacerdos Dei summi, qui obuiauit Abraham regresso à cæde Regum, & benedixit ei: cui & decimas omnium diuisit Abraham.* Quomodo autem has easdẽ laudes, neruis consequentiæ inferat, paululum considera: *Intuemini*, inquit, *quantus sit hic, cui & decimas dedit de præcipuis Abraham Patriarcha.* Quot gradus in vna decima laudis & honoris? Primùm enim maximis Melchisedechi laudibus, decimarum censum annumerat. Deinde post benedictionem à Melchisedecho Abrahamo factam decimis locum designat. Tertio, in his laudibus sæpiùs meminit decimarum: quinquies enim ad minimum. Quòd si eos consulas, qui præcepta rei alicuius exaggerandæ tradunt, inuenies in munere decimarũ, aut primam inesse laudem Melchisedechi, aut certè ex præstantissimis non postremam. Præterea Abrahamũ Patriarcham decimas pendisse dicit: *Cui, inquit, & decimas dedit de præcipuis Abraham Patriarcha.*

archa. ac si apertius dicat, non solum eum decimas pendisse quatenus Abrahamus esset; sed etiam quatenus esset Patriarcha. Adde & illud, quod non solum decimas dederit, sed etiam de præcipuis dederit. Ad extremum, consequentiam laudis Melchisedechi ex decimis petitam, cum admiratione quadam effert; ut tali dicendi forma ostenderet, admirandum esse Melchisedechum, cui decimas penderit Abrahamus Patriarcha. Quid igitur? an à Christiano homine in dubium vocari potest; cui decimæ & victimæ tribuuntur; ei maximum & diuinum quendam honorem impendi? Cum igitur Salomon, innumeras & præstantissimas victimas, & hostias, cæteraque dona Deo imprimis, deinde Sacerdotibus obtulerit; an non constat, eum maximum honorem Sacerdotibus habuisse? Ergo illam summam & inusitatam admirationem Reginæ Sabæ, in sapientia & pietate Salomonis mentem & cogitationem defixam habentis, non solum victimarum & hostiarum magnitudo, sed etiam Sacerdotalis dignitatis præstantia commouit. Quid? an non & illa maximam honoris Sacerdotalis rationem habent? omnes Sacerdotes, qui sub id tempus in Israël reperiiebantur ad Regem Salomonem confluunt: Sacerdotum fidei thesauri templi committuntur: domus Dei habitatio assignatur: arca fœderis, quam principibus viris at-

3. Reg. 4. ris attingere nefas erat, ab illis portatur: Azarias, filius Sadoc sacerdotis, primus princeps Israëlitis nominatur: Sadoc & Abiathar sacerdotes, inter primos principes Salomonis numerantur: inter omnes principes vnus Zabud filius Nathan Sacerdos, amicus Regis Salomonis appellatur. Sed illud longè mihi maximū videtur: quòd ipsemet Deus clemētissimus victimas & omnes hostias, suo diuino honori dicatas, in libris Numerorū Sacerdotibus ascribat. ascribat autem magna cum beneuolentia & dignitate. Quid enim? an non ea ratione perspicuū est, Deum benignissimum, quasi diuisum imperium & honorē cum sacerdotibus habere voluisse? O inauditam Dei clementiam! ô Sacerdotum dignitatem diuinam & admirabilem! Quid enim præstantius rerum omnium authoris Dei imperio & dignitate? Ac ne is honor à singulari virtute diuina abesse videatur, muneri & officio Sacerdotali summam imposuit potestatem. Nam portare populi errata, Dei munus est proprium. Hoc enim Christo Deo Isaias Propheta munus assignauit: *Vere, inquit Propheta, languores nostros ipse tulit, & dolores nostros ipse portauit.* & paulò post: *Pro eo quòd laborauit anima eius, videbit & satumbitur: In scientia sua iustificabit ipse iustus seruus meus multos, & iniquitates eorum ipse portabit.* Atqui munus portandi peccata imponitur Sacer-

dodibus

dotibus, in libris Numerorum, satis apertis verbis id declarat Moyſes : *Dixitq; Dominus ad Aaron : Tu Num. 13.*
& filij tui, & domus patris tui tecum portabitis iniquitatem ſanctuarij. Adde & illud, quod etiam plurimum exaggerat dignitatem Sacerdotij : *Excubate, alloquitur eoſdem Sacerdotes Dominus, in cuſtodia ſanctuarij, et in miniſterio altaris : ne oriatur indignatio ſuper filios Iſmël.* Ergo in vigilia & cuſtodia Sacerdotij tantum ſitum eſt ; vt omnia iræ diuinæ tela à populo Iſraëlitico auertat. Incredibilia hæc prorfus viderentur, niſi ea diuinis literis ad perpetuam memoriam eſſent conſignata. Atque illa quidem Dei clementia, qua Deus Opr: Max: Salomoni bis ſeſe oſtendit, & illum, familiariffimè cum eo locutus, immenſa beneficētia cumulauit, maximo honore & dignitate Sacerdotium in cælum effert. Hoc enim tantum & admirabile beneficium, poſt litatas hoſtias, & viſtimas, apud Salomonem poſuit munificentiffimus Deus. Nimirum ea ratione omnibus teſtatum eſſe voluit : immenſa beneficia, quale illud fuit ſuam diuinam gloriam Salomoni oſtendere, nõ niſi viſtimis & oblationibus, quæ manibus Sacerdotum cõficiũtur, à Deo in homines peruenire. Quid igitur mirum Salomonem ſapientiſſimum, qui ſuis momentiſ omnia ponderare nouerat, innumeris oblatiſ viſtimis, primùm Deo, deinde Sacerdotibus maximum honorem habuiſſe ?

Hic ego iam Salomonis laudis & gloriæ immensum quasi pelagus præteruectus orationis meæ vela contraherem, teq; REX ferenissime, exemplo huius sapientissimi Regis, ad summas religionis Christianæ virtutes vehementer incitatum, paucis verbis cohortatus, finem dicendi facerem. Sed quoniam hoc nostro infelici æuo, Sacerdotij munus amplissimum ita concidit; vt in hominum nostrorum æstimatione, vix illius honoris vmbra teneamus; eamobrem non nihil adhuc in eius amplitudine explicanda immorabor. Te autem imprimis, REX ferenissime, pro meo Sacerdotali officio admonebo, teque pro mea tibi debita obseruantia, & egregia in tuam amplitudinem voluntate obsecrabo, obtestaborque; vt tanquam Rex sapientissimus, belliq; Imperator solertissimus, imprimis eam regni partem tibi tuendam esse proponas, in qua maxima illius salutis & incolumitatis præsidia diuinitus posita esse animaduertis. Quis autem non videt illud summum in Repub. esse, quo diuinæ gratiæ, sine qua nec Reges regnant, nec imperia consistunt, fontes concluduntur? Nam illud D. Pauli: *Gratia Dei sum, id quod sum*, in omnes omnium temporum homines conuenit. Gratia enim Dei, omnes viuimus, mouemur, & sumus. At omnem suam gratiam in meritis vnigeniti Iesu Christi Domini nostri, eiusque sa-

que sacrosancto sanguine conclusit Deus. Nam vt cum D. Paulo loquar : *Omnia penè in sanguine secundum legem mundantur : & sine sanguinis effusione non fit remissio.* Cùm autem arcam illam, & sanctuarium, præter Sacerdotes, alium quempiam attingere, scelus sit grauissimum ; quis non intelligit, eversa dignitate sacerdotali, totam Rempub. labi & cõcidere ? Ex his itaq; in eum modum ratiocinari homines Christiani debent. Si Salomon Rex sapientissimus Sacerdotibus legis Mosaicæ tantum honorem habuit ; quanto in pretio Christianis hominibus, imprimis autem Regibus & Principibus Sacerdotes Iesu Christi esse debent ? qui non sanguinem taurorum & vitulorum, sed Iesu Christi corpus & sanguinem, pro vita & salute hominum, Deo clementissimo offerunt : qui non ad sancta sanctorum ; sed ad ipsum cæleste regnũ aditum patefaciunt & præcludunt : qui denique non sacramentis veteris legis typum & figuram corporis & sanguinis Iesu Christi gerentibus ; sed ipsius filij Dei corpore & sanguine ; quo sub Sole, & suprà Solem, nihil est maius, nihil præstantius, nihil diuinius, homines Christianos pascunt. Atque hæc quidem consequentia adeò firma est & efficax ; vt eam ipsi Ecclesiæ Dei hostes hæretici pondere illius oppressi, non refellant ; sed ad eneruandum Iesu Christi Sacerdotium ex eo, quod

omnibus Catholicis in confesso est, variis cuniculis elabi contendant. Alij enim Catholicæ & Romanæ Ecclesiæ Sacerdotes, negant esse Iesu Christi Sacerdotes: alij ex institutione cœnæ Domini sacrificium detrahunt: alij vi quadam & energia corpus Iesu Christi & sanguinem ex Eucharistia tollunt: alij à veritate corporis & sanguinis Iesu Christi, ad Iudæorum figuras & typos resiliunt; & potius esse ducunt, gradum ad Iudaismum & Atheismum facere, quàm tantum Sacerdotio Iesu Christi honorem deferre. Adeò aciem hæreticorum opibus & patrimonio Iesu Christi inhiantium, Sacerdotalis honoris splendor perstrinxit. Verùm ego hoc loco, hosce crassos & perniciosos errores hæreticorum non refutabo. Satis illud nunc erit: in ea consequentia, maximam vim inesse ad augendâ Sacerdotij Iesu Christi dignitatem. Quod, cùm ita sit, profectò Christianis Principibus deliberandum non est; an Sacerdotio Iesu Christi maximus honor sit decernendus; sed in eo elaborādum; vt eorum autoritas, quibus ipse Deus Opt: Max: omnium humanarum atq; diuinarum rerum apicem, in Romano Petro ita imposuit; vt hoc principe, ex illis pendeant, & ad illos redeant vniuersa, in pristinam dignitatem, veteris Iesu Christi Ecclesiæ legibus & institutis corroboratâ restituatur. Et quoniam, vt in corporis ita in animi morbis,

morbis contraria contrariis curantur; eamobrem diligentius inuestigandum est, quibus principiis tanta religionis Catholicæ lues in Poloniam irrepfit; vt cognita morbi natura, tibi imprimis optimo Regi singulari studio in amplificandam Iesu Christi gloriam inflammato, salutarem medicinam indicaret. Sed non est difficile diligentius perquirentem omnia, in eius rei cognitionem venire. Principium enim tanti mali, ab illa vulpecula Esopi fabulis celebrata, exortu est. Non tibi hoc mirum, aut ridiculum videatur, REX serenissime. Non enim res ea cachinno, sed magna commiseratione est digna. Fraus enim hæreticorum ab illa vulpecula in fabulis, dolo & astutia rustico insultanti, delendæ in Polonia religionis Catholicæ, hoc est, vniuersi perdendi regni consilium accepit. Cuius quidem fabulæ ignorantione, aut certè, vt leuissimè dicam, admirabili in negotio Iesu Christi torpore & socordia, maiores nostri, qui tunc clauum Reipub. tenuerunt, has omnes religionis & pietatis Christianæ clades ediderunt. Cognosce vulpis huius in dolo & fraude sagax consilium. Hæc enim, cum vidit rusticum res ad victum necessarias vehentem, ab eo enixè postulauit, vt de longinquo itinere fessam curru suo vehat. Negat rusticus. Hic illa singularis modestiæ speciem induta; at saltem, inquit, caudam, tua be-

nignitate, currui imponere liceat. Rusticus ad astū animum non attendens, vulpeculæ annuit. Illa verò cauda imposita, paulatim toto corpore in currū insiluit, & magno damno factō, rusticum irrisit. Ad eum planè modum, acerrimus humani generis hostis Sathanas, per suos satellites, Polonorum pietati & religioni insidias struxit. Non statim ille suam licentiam cum intolerabili impietate coniunctam, in Ecclesiam sponsam Christi, in sanctos, & denique in ipsum Dei filium debachandi legibus cōmuniri postulavit. Sed, quod id parum ad religionem Catholicam referre dictitabat, de legibus Ecclesiasticis primum nonnihil, non ægrè id quibusdam Prælatiis ferentibus, deinde multum detraxit. post à tribunali, & iudicio Ecclesiastico populum removit: atque ita ad occupandas decimas & patrimonium Iesu Christi aditum sibi paravit. Quo progressus quid tandem non est ausus? An non carceres, quibus blasphemia & impietas coercebatur perfregit, & Lutheri primū fidei, quod eam diceret in quibusdam tantum ἀσφαλές, dissidere, blandè cauda hac homines parum ad dolos & astum attentos demulcens, ianuam in Poloniam aperuit. Atque in hoc etiam vulpina modestia suū virus contextit. Mirum enim in modum primo execrabatur Sacramentarios & multò magis Anabaptistas & Arianos. Quo tamen factō,

facto omnibus istis sceleratissimis Sathanæ ministris, ita viam in Poloniam ad omnem licentiam mu-
niuit; vt nunc illis cum extremæ impietatis ferro &
sicca, non solùm per domos, plateas, & forum, sed
etiam per ipsam regiam erecta crista impunè liceat
volitare. Ergo illa quorundam pastorum Ecclesiæ
Dei solatia, quos pro domo Dei pugnare pigebat,
spem bonorum omnium sefellerūt. Aiebant isti, fu-
nestam hanc religionis Christianæ pestem suo mo-
tu interituram. Quasi vero, flamma, nisi statim op-
primatur, ita humanæ calamitatis rationem ducat;
vt ante se ipsam à damnis miserorum cohibeat; quā
maximis aucta ardoribus omnia incendio conficiat
& consumat. Habes igitur, REX serenissime, mali
huius ortum, & progressum: in quorum cognitio-
ne, salutaris medicinæ ratio se ipsam tibi ostendit.
Contraria enim, curantur contrariis. Minima pri-
mùm ea pestis vastare cœpit: tu etiam pro tua sin-
gulari in Iesum Christum pietate, ea, quæ minima
in religione Catholica videntur, tua maxima tute-
la & præsidio, comprehendes. Iesu Christi & san-
ctorum cultus, sacramentorum vsus, autoritas sedis
Apostolicæ maxima sunt in religione Catholica:
minora illa sunt, opes, decimæ, & honos Sacerdo-
tum; tu tamen, REX optime, vt ipla religionis Chri-
stianæ fundamenta in pristinum splendorem vindi-
care

care possis omni ratione, ne minima etiam re Sacerdotum autoritas lædatur procurabis. Magnus est in eo tuus honos : magna dignitas. Audi obsecro, REX serenissime, in quo sanctissimus ille Theodosius Imperator, alter in Christiana religione Salomon, maximè omnium populorum & nationum linguis celebretur, summisq̃ue laudibus in cælum vehatur. Ferunt hūc piissimum Imperatorum cuidā Sacerdotem sceleris admissi accusanti respondisse : Iudicium de Sacerdotum, vita & moribus, ad se nō pertinere. Ergo iste piissimus Imperator, Sacrosancta tribunalia Sacerdotum, leges, honores, opes, & fortunas à suis ciuibus violari, euerti, & auferri grauisimum esse crimen censuisset, omniq̃ue ratione tanto sceleri obstitisset : cū de vnus mali Sacerdotis vita & moribus, iudicium à se institui nefas esse iudicârit. Verū, si domestica exempla magis ad virtutem alliciunt : præclarum in eo genere sanctæ memoriæ Stephanus Rex, affinis tuus, ex hac mortali & caduca vita, ad beatorum sedes & immortalem felicitatem commigrans, pietatis & virtutis Christianæ monumentum posteritati constituit. Ex quo tu, REX serenissime, intelliges : te non in cuiusvis hominis, sed in Rege Stephano, in illius sanctissimi Theodosij locum, Regem Poloniæ successisse. Hic alter Regni Polonię Theodosius quen-

dam

dam Sacerdotē conuiciis nomē suum concidisse intellexit. Quid igitur Rex optimus fecit? an Sacerdotem ad suum tribunal rapi iussit, & iudicium læ-
fæ maiestatis de eo institui? Minimè verò. Sed totum negotium, cum magna modestiæ & patientiæ significatione, ad Reuerendissimū Episcopum Præ-
misliensem, Albertum Baranouiū, Regni Poloniae Procancellarium, integritate vitæ & rerum maximarum vsu clarissimum, detulit, eiusque iudicio commisit, quid in ea re faciendum, quodūcūq; huic malo remediū adhibendū esset. Hic optimus Episcopus, pro sua singulari sapientia & pietate, decere Regē tantū iudicauit, ei Sacerdoti conuitiū iactū aliquando condonare, qui agnita culpa, pro regis salute & dignitate sapius vota esset facturus. Paret religioso Episcopo Rex pius & sapiens, & loco poenæ magna beneuolentia Sacerdotem afficit. O admirabilem Stephani Regis pietatem, & Christianā humilitatē, literis monumentisq; prædicandam! Non enim tantum piissimī Theodosij Imperatoris, in hoc suo facto pietatem ad viuum expressit; verū etiam superauit. Ille enim alienā iniuriam non vindicauit; hic suam: ille Sacerdotem à suo iudicio absoluit; hic etiam beneficentia ornauit. Atq; hæc quidem & aliæ, Stephani Regis virtutes, sapius sese infinitis rerum cælestium cupiditatibus in lucē efferebant. Itaque

Stanislaus Socolouius, vir ut vitæ sanctimonia & singularis patientiæ exēplo, ita eruditionis & eloquentiæ laude celeberrimus, eiusdē præstantissimi Regis Theologus, tam insignibus titulis, eum excellentem Regem dignissimum esse iudicauit: ut eum in templo, plus quàm Sacerdotem: in Ecclesia Dei, plus quàm catholicum: in Repub. plus quàm Regem: in sententia dicendi, plus quàm Senatorem: in iudicio, plus quàm Iurisconsultum: in exercitu, plus quàm Imperatorem: in acie, plus quàm militem: in publica libertate tuenda, plus quàm ciuem: in amicitia colenda, plus quàm amicum: in tota reliqua vita, plus quàm philosophum: & denique in aduersis perferendis, iniuriisquē condonandis, plus quàm virum esse dixerit: hancquē illius admirabilem gloriam, literarum monumentis ad omnem posteritatem transmiserit. Sed cū hoc loco, huius piissimi Regis, omnia præclarè & religiosè facta enumerando non liceat percensere; illud certè diuinæ & maximæ charitatis flumen, quod moriturus ex pectore suo effudit, silentio inuoluere nefas esse existimo. Lege tabulas illius testamenti, SIGISMUNDE REX serenissime, & intelliges quibus flammis amplificandæ Catholicæ religionis, & Sacerdotalis honoris, Rex fortissimus pectus habuerit incensum. Ponam hoc loco aliqua testamenti illius

verba

verba, literis ab ipso consignata: *Ad te*, inquit piissimus Rex Stephanus, *redeo charissime Nepos, Princeps Transylvaniæ, Sigismunde Bathori, tibiq; impri-
mis Collegiũ Claudiopopolitanũ et Albenſe lego & cõmit-
to. Quæ Collegia pater tuus, & ego fundauimus, pro-
priis ex facultatibus nostris, sine cuiusquam iniuria:
quos ita tucaris & defendas, quatenus animæ tuæ pa-
triæq; cui præes, salus tibi cõmẽst.* O admirandã &
nõ humanam, sed diuinam Stephani Regis Bathorej
sapientiam, qua ipse Sacerdotalis dignitatis, nõ ex-
ternam tantũ figuram, vt vulgus solet; sed intimã
ipsius formam & speciem animo comprehendit:
hocq; suo factõ, vniuersos Christianos docuit, quid
sit mons ille, in quo Deus apparebat: quid arca fœ-
deris, quæ sæpius hostes profligabat: quid virga
Moyſis, quæ maria exsiccabat, & de petra flumina
educebat: quid stellæ in firmamẽto cæli: quid por-
ta cælestis: quid lux mundi: quid Elifeus à pueris
illusus: quid Moyſes orans: quid denique Melchi-
sedech Sacerdos altissimi, pro Abrahamo sacrificãs
eique benedicens? Atque hæc quidem Sacerdotij
dignitas, cùm suo pondere in Ecclesia Dei æstimare-
tur, florebant omnia, splendorq; diuinæ maiesta-
tis vniuersa complere videbatur: Iosue hostes mi-
rabiliter vincebat: Gedeon paruo stipatus milite,
maximas hostiũ cateruas superabat: vnus mille fu-
gabatur

gabat Ionathas: Dauid sternebat Goliath: Israël's populus Amalechitas terrebat: vnus denique Moyſes dux & Sacerdos, virga mari percuffo, vniuerſum Pharaonis exercitum trucidabat: columna ignea è cælo miſſa populum Dei ducebat: manna paſcebat: aqua dulciſſima ex petra manans ſitim irrigabat. His & id genus aliis ſuæ clementiæ & benignitatis clariſſimis testimoniis, præpotens Deus Israëlitici populi pietatē illuſtrabat. Poſteaquam verò in Iudæa Sacerdotalis dignitas eleuari cœpta eſt; è veſtigio idem Israël's populus horrendis ſpectaculis eſt perterrefactus. Coræ, Dathan, & Abyron, dum Sacerdoti Moyſi authoritatē detrahunt, repētino terræ hiatu ablorbētur: Oza, filius Ahio, tangens fœderis arcā occiditur: Ozias Rex, Sacerdotū munus ſibi vendicans, lepra percutitur: Regis Ioræ extenſa in Prophetā manus exſiccata, à munere vitæ & officio præciditur. Non minùs illuſtria eius rei in vtramque partem comprobandæ, in Chriſtianitate habemus exempla. Quid enim? an nō illi clariſſimi Reges & Imperatores, qui inter gubernandi & propagandi imperij artes arctā illam Chriſtianæ religionis diſciplinā, primam & potiſſimam eſſe duxerūt, ſæpius admirabili & diuino planè modo ex hoſtibus victoriam reportârunt? An nō & Conſtantino Magno cōtra Biſantios & Scythas, & Conſtantino cōtra Britanio-

Britanionem & Magnentiū pugnanti, Imperatori- cap. 47. & 49. & lib. 9. cap. 32.
 bus sanctissimis, signum Crucis Iesu Christi admira-
 bili splendore circumfusum, in cælo media luce, spe-
 ctante vniuerso exercitu, tremantibus omnibus ap-
 paruit, eorumque hostes contriuit, prostrauit, & in-
 teremit? An non & Theodosio Christianissimo Im-
 peratori, qui Reges cum purpura & maiestate re-
 gia, humilitatē Christianam, & ardens diuinæ legis Niceph. Eccl. hist. lib. 12. cap. 39.
 studiū coniūgere docuit, S. Ioannes, & Philippus A-
 postoli apparuerūt, ac candidis equis vecti, tanquā
 fortissimi duces, contra Eugenium maximo & robu-
 sto exercitu exultantem primi in acie dimicârunt,
 ac temporis momento horribilem stragem edide-
 runt, diuināque & admirabili victoria Theodosium
 illustrârunt? Placetne illarum mentium beatarum,
 quas Angelos & Archangelos nominamus, præsidia
 videre? An non ipsemet Michaël Archangelus, to- Niceph. lib. 7. cap. 50.
 tius militiæ cælestis princeps, contra Christiani no-
 minis hostes, in Magni Constantini exercitu sapius
 militauit, ac ipsi admirabili forma & specie appa-
 rens, veluti arctissimo fœdere amicitiae coniuncto,
 de hac sua egregia in eū volūtate significauit? Obti-
 nuit, Rex serenissime, & tui proauī pietas & vir-
 tus, Vladislai Iagellonis, eam à clementissimo Deo
 gratiam; vt, qui istorum sanctissimorum Imperato-
 rum pietatem imitando exprimeret; eorum quoque

Rmūs
Crome-
rus &
Miecho-
uien, in
historia
Poloni-
ca.

cælestibus & admirandis triumphis, suæ virtutis bel-
licæ gloriam cumulet. Quid enim? an non & istū
Christiana pietate & humilitate excellentem Regē
S. Stanislaus è sublimi cælo demissus, ac in splendi-
dissimo aëre vniuerso exercitui apparens, contra
Crucigeros iusto prælio certantem, ita diuina vir-
tute armauit; vt maximis & fortissimis totius ferè
Germaniæ copiis, eruenta & horribili cæde supera-
tis, vniuersam Prussiam Regno Poloniae adiunxe-
rit? Itaque, Christianis & piissimis Principibus, illu-
striora & admirabilia belli præsidia, diuinitus cō-
cessa sunt; quàm illa fuerunt, quibus singularis in
Deum pietas & obseruantia, Israëlis gentem nobi-
litauit. Quid illa alia, quæ in pace florentes, red-
dunt Respub. qualia & quanta fuerunt? concordia
ciuium: virtutis ardor: rerum copia: salubritas aëris:
optata tranquillitas: conseruatio ordinis: iustitiæ
& æquitatis integritas: vitæ sanctimonia: & splen-
dor quidam diuinæ lucis, velut manna cæleste ho-
minum animos mirificè afficiens, & rerum diuina-
rum studio inflammans. Quæ omnia, pestilens hæ-
resis, quæ à sprete contemptaq; Sacerdotali auctho-
ritate & dignitate ortum habet, vt primùm suum
extulit caput, de suo gradu deiecit ac deturbauit; in
eorumque locum ordinis perturbationem, impieta-
tem, seditionem, cædem, famem, pestem, horrendū
rerum

rerum omnium chaos, ac denique sæuissimam iram Dei tantorum scelerum vltricem inuexit. Hæc Græcorum splendorem extinxit : Germanis belli gerendi fortitudinem ademit : Bohemiæ libertatem perfregit : Moraviæ iura euertit : Moschouiam barbara immanitate fœdauit : Hungariam discerpsit : Hyberniam afflixit : Scotiæ sceptrum eripuit : Gallis cælitùs concessa dona imminuit : Flandriam seditionibus & bellis attriuit : denique omnium Christianorù ceruicibus impurissimù Turcam imposuit, atq; ea ratione apicem summæ dignitatis detraxit. Quæ Charybdis tã vorax, tot tantasq; res tam citò absorbere potuisset ? Verùm, cùm alias nationes oratione obo, Poloniam nostrã, in qua hæresis ipsa hoc nostro infelici tempore insigne constituit documentum, silentio præterire non licet. Etenim ad ea nunc tépora, nescio qua infelicitate delapsi sumus, in quibus vel maximè hæresis & impietas hominù, Sacerdotij munus amplissimum, cupiditate ac furore perfregit ac prostrauit ; adeò vt nisi Sacerdotio vel nobilitas generis, vel rerù copia & opes, vel aliqua externa species, vulgi sensum aut animos commouens adiuncta fuerit, facilè Sacerdos in vulgarem popularemque ordinem redigitur, contemnitur facilè, spernitur, abiicitur. Non in eo spectatur regalis vnctio : non Christi character : non diuina potestas :

stas : non clauēs regni cælestis : non ligandi & soluendi authoritas : non sanctissimorum sacramentorum efficientia : non diuinæ lucis & sapientiæ communicatio : non tot tantaque salutis præsidia : non Melchisedechi typus & figura : non admirabilis diuinæ maiestatis vis & potestas : quam sanctissimi patres angelicæ dignitati prætulerunt : à qua celeberrimi illi Reges & Imperatores , salutis & felicitatis suæ bona secundum Deum promanare putauerunt : cuius diligenti contemplatione , Christiana sapientia præstantes viri semper obstupuerunt. Quid multis ? hoc nostro infelici seculo , Sacerdotes Dei amplissimi , sui muneris nomen retinuerunt , speciem & decus apud homines minus sapientes amiserunt. Atqui hoc eodem nostro infelici tempore , Poloniæ Regnum tot tantisque difficultatibus affectum & afflictum est ; quantis antea nunquam : vt ex eo omnibus manifestè appareat ; vt ex hominū impietate , contemptum Sacerdotij , sic ex contempto spiritus ; Sacerdotio , omnia Reip. mala exoriri. Neque verò difficilè est , te optimo Rege cū maximo totius Reipub. commodo , ad regni gubernacula sedente ; maxima tamen in Polonia mala , sæpius ex multis partibus ostendere. Religio enim & pietas , est Reip. fundamentum , quæ nunc in Polonia ita contracta est , & adducta in angustum ; vt non tantum Ecclesiam

fiam Dei spernere : leges Dei euertere : sanctos contemnere : illorum templa prophanare : statuas confringere ; verum etiam ipsam sanctissimam Trinitatem blasphemare : filium Dei diuinitate exuere , & è sublimi diuinæ maiestatis folio deturbare , cuius impunè liceat. Hoc ita se habere omnes vident. Itaque maximam plagam ira Dei hominibus nostris inflixit ; quòd ex ea Lerna teterrimæ istius impietatis & blasphemix , omnia mala in regni fortunas erumpere non videant. Quid enim aliud est Pharaonis excoecatio & Cimmeriæ tenebræ , si hæc tanta offusa rebus Christianis caligo nō est ? Ac ego quidem existimo , neminem , qui modò diuinis oraculis fidem habeat , dubitare , hæresim omnium malorum Lernam & sentinam esse. Nam cū religionem & pietatem , Dei gratia & clementia consequatur : hanc verò felix fortunatusq; rerum omnium progressus , splendor , dignitas , omniumque bonorum maxima incrementa ; profectò confitendū est homini Christiano , summam blasphemiam & impietatem , summi in Repub. mali fontibus scaturire. Sed quid argumentis opus est ? Extant in sacris literis testimonia clarissima. Testis est vniuersa illa generis humani propago , quam Deus iustissimus , solo cū aliquot amicis conseruato iusto pioque Noëmo , ob scelus & impietatem aquis diluuij suffocauit. Testis est

Sodoma & Gomorrha, quam propter nefandum scelus, igne & sulphure succensam, in profundissimum infernum demersit. Testis est obstinatus & superbus Pharaos, quem monitis diuinis parere recusantem, cum vniuerso exercitu rubrum mare absorbit. Testis est Israëliticus populus, cui maximorum beneficiorum ingratisimo, Deus sceleris vindex, promissam illam regionem, melle & lacte difluentem, negauit. Testis est Saul Rex primus Iudæorum, quæ ut Deus ob animi summissionem in regiam dignitatem euexit; sic eundem ipsum totamque posteritatem, ob superbum & elatum animum de solio regali deturbauit. Testis est Ieroboam Salomonis filius, à cuius imperio, impietas & crudelis in ciues animus maiorem partem regni segregauit. Testis est Nabuchodonosor Rex Babylonis, quem seuerissimus Deus, propterea quod templa Dei vastârit, sacra vasa confregerit, Sacerdotes spoliârit, regno omnibusque opibus exutum, in bestiam conuertit. Testes sunt præterea tot Reges & Principes, totque nationes, quas Deus partim ob impietatem, partim ob iniquum in Prophetas & viros Dei animum, partim ob alia scelera, grauissimis poenis multauit. Testis denique est celeberrima illa Niniue, cui Ionas Propheta, nisi resipuisset euersionem denunciavit. Testis ad extremum est nobilissima
illa

illa Ierosolymæ ciuitas, quæ, quia verbis Christi fidem habere noluit, solo æquata, funditusque euerfa & excisa est. An non igitur Sole clarius est scelere & impietate, regna & imperia concidere? Eritne iam aliquis Christianus, qui in dubiū vocabit hæresim, impietatis parentem ad maximū interitum regni spectare? Hoc autē constituto, reliquum animo Christiano & sapienti facilè occurret. Cū enim diligenter perpenderit, Deum impietatis ultorē esse, blasphemix verò & hæresis maximum: neque idcō, quia pœnas in longius tempus differt scelere non offendi; imò verò procrastinatione & mora, ni homines resipiscant, acriores parare pœnas; an non vehementer metuendum existimabimus; ne quemadmodum Polonia, virtuti & religioni iniecit frenum, hæresi autem & impietati omnes dissoluit habenas; ita iustissimus Deus, & acerrimus sceleris & impietatis vindex, suas cælestes copias, quibus hactenus in tot tantisque periculis Poloniam sustentauit, cohibeat; hostesque magna vi & robore instructos, ad illius euertendam Rempub. emittat? Quæ quidem Dei iustissimi maxima vindicta, an non his proximis temporibus odiis ciuium, auaritia hominum, bellis ciuilibus, fame, peste, militum prædationibus, clamoribus pauperum, tot tantorumque machinationibus hostium crumpere videbatur? Atque

hās quidē Dei vindictæ malorumq; turbas, cū viri
 pij & sapientes nondū penitus sedatas esse videant;
 & ramos tantū amputatos, non autem fibras, qui-
 bus illorum radix nititur, euulsas esse animaduertāt,
 nondum sibi quasi depulso omni metu exultandum
 esse statuunt: affliguntur tantis Dei vindictæ causis:
 turbantur significationibus: & quemadmodū peri-
 tissimi nautæ in alto mari, signis cæli, quæ grauissi-
 mas commouent tempestates, & aliis id genus, im-
 peritis quidem obscuris, illis autem notissimis cau-
 sis plurimū perturbantur; sic illi ex scelere & im-
 pietate, qua Deus ad magnā vindictam concitatur,
 magno dolore afficiuntur. Neque verò illos latet,
 nō paucos nunc in Poloniæ Regno excellenti virtute
 & pietate esse, Deumq; propter quinquaginta iu-
 stos, Sodomis parcere voluisse; sed illud etiam inte-
 rim probè sciunt, & propter vnum Ionatham, man-
 datum Dei transgressum, totum exercitum Saulis, &
 propter vnum peccatum Dauid, totam Iudæam gra-
 uiter, eundem iustissimum Deum, afflixisse. Vna est
 Dei clementia, quæ illorum mœrentes animos lenit
 & solatur. Illa, inquā, Dei clementia, quæ te, S I G I S-
 M V N D E R E X serenissime, illius Iagellonicæ stirpis,
 cuius singulari virtute & pietate, Polonia maxima
 ornamenta est cōsecuta, progenie excitata, ad huius
 Regni gubernacula collocavit. Neque enim Salomone

mone Rege licet iuvene, sapientissimo tamen & pi-
 issimo Israëlem gubernante, regnum illud discordia
 & dissensionibus ciuium scissum, de florentissimo
 statu decidit; sed illius sapientia & æquitate ita au-
 ctum est & locupletatum; vt neque antea, neq; pòst
 felicius & illustrius fuerit vnquam. Atqui in te, R E X
 optime, admirabilis quædam diuina sapientia elu-
 xit, cùm diuino lumine collustratus, tanto Christia-
 næ & Catholicæ religionis studio exarseras, vt Iesu
 Christi gloriâ rebus omnibus, quæ in vita sunt cha-
 rissimæ, vitæ denique ipsi anteferres. Nota est no-
 bis insignis tua illa pietas, cuius tu diuino illo igne,
 quem filius Dei Iesus Christus è cælo in terram ve-
 niens, pectoribus sanctissimorum hominum immi-
 sit, incensus atque inflammatus, patri tuo serenissi-
 mo Sueciæ Regi, te minis à religione Catholica,
 hoc est, à Iesu Christo deterrere cupienti, tuum hoc
 diuinum caput, cum tot maximis Christianis virtu-
 tibus, regio diademate cinctum, obiecisti: eoque fa-
 cto, charitatem sanctissimorum hominum, qui pro
 gloria Dei sibi ceruices præcidi permiserunt, insi-
 gniter exprimente, patri tuo ostendisti, Iesu Christi
 amorem, & Catholicæ religionis studium, ita altè
 in pectore tuo radices defixisse suas, vt illud nul-
 lus dæmonis furor frangere & debilitare possit. O
 diuinam & admirandam charitatem, literis monu-

mentisq̃ue ad sempiternam posteritatis memoriam celebrandam ! Quòd si in Christianitate, vt quisque in Deum charitate flagrat, ita sapientia excellit, propter spiritum sanctum in eo inhabitantem, illiusq̃ue animum cognitione diuina illustrantem; profectò admirabilis ista tua sapientia, illa eadem existimanda est, cum qua Salomoni omnia bona venerunt. Est enim hoc in Christiana doctrina ratum & fixum: pietate & religione, regna fundari, illorumq̃ue splendorem excitari. Propter pietatem enim & religionem in Deum, illa immensa sapientia cum omnibus emolumentis regni Israëlitici, Salomoni diuinitùs concessa est. Ac ne quis existimet solum Salomonem, vel alium quempiam vnum, hæc tanta bona religione & pietate à Deo clementissimo obtinuisse: *Propterea ait Dominus Deus Israël: loquens locutus sum, vt domus tua, & domus patris tui ministraret in conspectu meo vsque in sempiternum. Nunc autem dicit Dominus: absit hoc à me: sed quicumque honorificauerit me, glorificabo eum; qui autem contemnunt me, erunt ignobiles.* Itaq; non dubium est, istam tuam insignem pietatem, totius Regni Poloniæ felicitatis principium & fundamentum esse. Verùm vt ex iis tuæ diuinæ pietatis principiiis, Regnum tuum nobilissimum Poloniæ, ad dignitatem & splendorem adducas; non tibi hîc consisten-

1. Reg. 2.

sistendū est: necesse est, vt flamma illa diuinæ chari-
tatis, sæpius ex pectore tuo in lucem erumpat: sæpi-
us te cælestis calor ad magna & præclara facta exci-
tet: frequenter tot & tantæ ruinæ Ecclesiæ Dei, pie-
tas profligata, domus Dei spoliata, Sacerdotij digni-
tas prostrata, vestis Iesu Christi scissa, patrimoni-
um filij Dei partim direptum, partim continuis in-
cursionibus, & hæreticorum, & semicatholicorum
vexatum, illam in animum tuum cogitationem in-
ducat; vt existimes, antequam Iesu Christi gloriam,
Sacerdotii honorem, Ecclesiæ victimas, & opes, à
maioribus sapientissimè sanctissimèque donatas ab
iniustis possessoribus vindices, Christoque & Eccle-
siæ eius restituas, te fecisse nihil; exemplo Salomonis
piissimi & sapientissimi Regis: qui antequam sum-
ma sapientia collustratus, charitate illa admirabili
flagraret, qua in templum magnificentissimè extru-
ctum, immensas opes & thesauros à Dauide Rege
donatos, intulerat, se egressum & ingressum suum
ignorare profitebatur; tantū abest, vt aliquod præ-
clarū opus se designasse existimaret. Ergo antequā
his præclarissimis factis maximam Dei gratiam, &
immortale decus tuo splendori adiungas; te Christū
Dominum, qui te in vineam suam cælestibus donis
cumulatum vocauit, his verbis compellantem exi-
stima: Quid, S I G I S M V N D E dilectissime fili, in vi-
nea

nea mea stas tota die otiosus: cur citiùs labentem
 sponsam meam Ecclesiam & matrem tuam, hume-
 ris tuis non sustentas? cur non ex eius hortis amœ-
 nissimis, noxias & pestilentes herbas euellis? cur
 tandiu fundum & patrimonium meum, ab hostibus
 diripi permittis? cur leges meas & Ecclesiæ sponsæ
 meæ hominum arbitrio, tanto tempore reuelli & re-
 scindi pateris? cur primo quoq; tempore Sacerdo-
 tes seruos meos, ex ea seruitute in pristinā dignita-
 tem non vindicas? cur tantæ licentiæ ministrorū Sa-
 thanæ, meam, & sanctorum gloriam proscindendi,
 quamprimùm frenum non iniicis? cur nobile gen-
 tē Polonam quamprimùm ex acerrimi humani ge-
 neris faucibus ereptam, tua insigni pietate omniq;
 alia ratione mihi nō restituis? His & id genus amā-
 tissimis vocibus, quoties ipsemet Iesus Christus ar-
 dens suæ religionis studiū in te excitat: excitat au-
 tem sæpiùs: toties te, serenissime REX, pietas ad Dei
 augendam laudem erigat: toties virtus ad tuendam
 Ecclesiam efferat; vt Iesu Christi religio & sponsa
 eius Ecclesia, ex tot tantisque fluctibus & procellis,
 tua pietate in optatum & tranquillum portum in-
 uecta, eiusdem Iesu Christi Dñi nostri pace,
 cum immortalis nominis tui gloria
 tandem aliquando per-
 fruatur.